





**ISRAEL,
MBUMBA YA
KUSANKHULIWA
TOWERA ITIPASE
MUOMBOLI**

THANYO YAKUTOMA YA UKATEKUMENO

**ISRAELE,
MBUMBA YA
KUSANKHULIWA
TOWERA
ITIPASE
MUOMBOLI**



THANYO YAKUTOMA YA UKATEKUMENO

PYA NKATI

ISRAELE, MBUMBA YA KUSANKHULIWA TOWERA ITIPASE MUOMBOLI

Usachitwa tani nsoka wa katekeze	06
1. Kuchemerwa na Kupikirwa kwa Abram	08
2. Tsembe ya Isaki	10
3. Yakobe achita Chibverano	12
4. Zuze na Abele ache ku Egito	14
5. Mulungu achemera Mose towera kuwombola mbumba yache	16
6. Chakudya chipswa cha ana a Israele	18
7. Kuwambuka bara yakufwira: Eksodo	20
8. Mbumba n'thando: Madzi, Mana, Mayesero	22
9. Chibverano pa phiri ya Sinai	24
10. Chibverano na Matongerero Khumi (10)	26
11. Mulungu achemera Samuele	28
12. Davide, Mambo wankulu, Kholo wa Misiya	30
13. Mulongerero Eliya	32
14. Mbumba yakukhonda kukoya Chibverano	34
15. Mphangwa ya Chibverano chipswa	36
16. Kudikhira mpulumusi: Ndzakazi wa mbuya	38
17. Pyakuchitwa: Mulungu apangiza kufuna	40
18. Munthu asalonga chinthu, angamala asachinja pontho	42
19. Mulungu ali na fala ibodzi	44
Kuthimiza: Masalmo	45
Maphembero a nsiko zonsene	46

Ku Pangiza

Ma Katekista na ma Katecumeno! Nsoka Arkidiocesano wa katekeze ali ku kupangizani katecismu wa chiwiri wa thanyo ya yakutoma ya ukatekumeno, una dzina ya «ISRAELE, MBUMBA YA KUSANKHULIWA TOWERA ITIPASE MUOMBOLI».

Mulugu asankhula dzindza ya Israele toera ikhale mbumba inafuna kubhalwa Yezu Kristu — mpulumusi wa dziko mba bulusa munthu na munthu mwa pyakuipa na mwakufa (Juwau 3,16). Kwa kutoma kwene Mulungu apikira Misiya pakumala ku-gwa Adamu na Eva m’madawo (Genesi 3). Kusogolo kwa ndima Mulungu atawirira kuti Misiya anazabalwa mwa makholo a Abamu, Izaki na Yakobe (Genesi 12,1-3). Yezu Kristu ndyo thangui ya ku malisa ydachita kuti Mulungu asankhule Israele kuti ikhale mbumba yache. Sikuti pikafunika kuti Mulungu akhale na “mbumba ya ku sankhulwa” tayo, mbwenye iye atonga kuti pichitike penepi. Pikafunika kuti Yezu abalwe mu nzinda. Na tenepa, Mulungu asankhula Israele.

Thangui idachita kuti Mulungu asankhule mbumba ya Israele si kubwera kwa Misiya basi tayo. Kufuna kwa Mulungu kuli aisraele ndi kuti iywo akhale anthu akufundzinsa anzawo pya Mulungu. Ikafunika Israele ikhale ndzinda wa anyansembe, aprofeta na anyabasa a dziko. Mulungu akafunambo kuti mbumba ya Israele ikhale yakusiyana; dziko ya anthu anakumbiza anzawo mpaka kufika kwa Mulungu. Masedze kazinji kene iywo akhala akudhodoma, mbwenye pidafuna mulungu kuli iywo piachitika: kudzesa Misiya, muomboli — mwa u’unthu wa Yezu Kristu. Na ipyo, katekumeni na katekumeni asachemerwa kuti akumbize andzawo kwa mulungu, akwate Yezu kuli ale adakhonda kundziwa; akwate chipulumuso kuli onsene. Akhale mpulumusi.

Machitiro

Nkati mwa katecismu iyi, phindi na phindi ya mafundzisiro ina samba na malembero a m’Biblya. Mphapo pisafunika kuti malembero a m’Biblya a werengwe, aykhwe munsolo peno nchifuwa mbafokotodzwambo na katekista mbadzati kupanguidza peno kuchululwa kuli akatekumeni. Ande, utawiri usapasirwa na makaliro a katekista. Si na mivundzo peno na kutawira pidakoywa munsolo basiyene tayu. Tenepa, na machitiro awa, tisafuna kumanga udziwi wa pyam’Biblya na makaliro a munthu pakati pa nsoka wa makristau. Mphapo nsoka wa mafundzisiro a katekese na katecismu iyi, usatowedza machitiro a diocese yathu. Ifembo, tathimidza malemba pangono towera kuphedza nfundisi pa mafundzisiro ache.


Awa ndywo makatecismu a njira ya ukatekumeno:

- 1. Bwerany** (Matomera a Ukatekumeno)
- 2. Israele, mbumba ya kusankhuliwa toera itipase muomboli** (Thanyo yakutoma ya Ukatekumeno)
- 3. Yezu, Munthu wa kuombokwa, iwe wabwera kudzatiombola** (Thanyo yachiwiri ya Ukatekumeno)
- 4. Ma sakramentu: Yezu ali pakati pa mbumba yache** (Thanyo ychitatu ya Ukatekumeno)
- 5. Nkristau pa makhaliro ache: Nyale ya kuyetima** (Chaka cha Batismu)

USACHITWA TANI NSOKA WA KATEKEZE

- 1.Iwe usatongwa kutoma kufika ndiwe pa mbuto ya katekeze.Na nguwo zakukhonda kuphingizika.
- 2 Tambira makatekumenu onsene mbodzi na mbodzi mbwaamwenyika mbuchedza na onsene. Anyakupfundza katekeze angatambirwa mwadidi asakomerwa mu ntima mwawo.
- 3-Mbudzati kutoma na katekeze chemera madzina.Galuza fala.Toma na maphembero peno na nyimbo.
- 4-Bvundza pidapfundza iwo nduli. Tani?
Kupangiza madzimunthu a pidapfundza iwo nduli na kwaabvundza.
Ndi ninji pidapfundza ife sumana idamala?
Ndi mafala api adakoya ife mu nsolo?
Bvundza mibvundzo yakukumbukira katekeze ya sumana idamala towera kuona kuti ndi ninji pinakumbukira iwo.
- 5-Ungamala utome na mapfundzisiro akutoma a ntsiku: "MBATISASANYIKENI TOWERA KUTAMBIRA MAFALA A MULUNGU."
- 6-Udzamale ndoko pa nsolo waciwiri "MBATIBVESERENI MAFALA A MBUYA" Usadziwa mwadidi mafala a m'bukhu ? Waalonge na mu nsolo basi nee kulang'ana pa bukhu. Mbugaluza fala nee kuchibidzisa. Pangiza madzimunthu a pa bukhu adalembwa pabodzi na mapfundzisiro a ntsiku.Chita mibvundzo ya madzimunthu.Mbwachululira kuli iwo.
- 7-Phemba anthu awiri peno atatu alonge pontho pidamala iwo kubva.Leka kubvundza anthu abodzi ene mambo onsene.
- 8-Chita mibvundzo towera kuona kuti mafala a Mulungu apita pyadidi mu ntima na mu nsolo mwa munthu na munthu.Mibvundzo iyi isaphedza anthu towera atowere Mulungu; mbatowera pya chedza;
- 9-Chulula mafala ninga manyerezere a pa nsolo wachitatu."MBATIBVESENI MAFALA AWA"
- 10-Chita mibvundzo ya pire pidamala iwe kuchulula.Ngakhala kuti anthu asapitawira mwadidi, iwo apibvesa.Iwo angakhonda kupitawira, aachululire pontho.
- 11-Longa peno sakisa fala yakufunika maka kukumbukira; uyu ndi nsolo wachinai". MBATIYIKHENI MU NSOLO MWATHU MAFALA AWA".Mafala awa,akatekumenu onsene asatongwa kwaadziwa mbaalonga na mu nsolo.
- 12-Chitisa kuti anyakupfundza katekeze adziwe kuti anachita mabasanji towera atoweze pya mafala.Ipi ndi pya nsolo wachixanu" MAKUMBUKIRO A MAPFUNDZIRO".
- 13-Towera kufungisa katekeze, sogolera maphembero a pa nsolo wachitathantu "TI-PHEMBE" towera kuti anyakupfundza katekeze aphembere na mafala adafundza iwo.
- 14-Iwe unakwanisa kufungisa na nyimbo

MULUNGU ACHEMERA ABRAMU



«Siya dziko yako, siya mbumba yako na nyumba ya babako. Ndoko ku dzikoinadzakupangisa ine. Ndinadzakuchita mbumba ikulu»

1. KUCHEMERWA NA KUPIKIRWA KWA ABRAMU

1. MBATISASANYIKENI TOWERA KUTAMBIRA MAFALA A MULUNGU

Papita pyaka na pyaka kutomera kuchitwa kwa pantsi pano. Anthu hakhadziwa tayu Mulungu wa maso. Iwo akhalambira alungu a pezi. Mulungu anyerezera kuzipangizika. Thangwi ya ipyo, Iye alonga na anthu akhafunika maka. Abramam ndi wakutoma adalonga na iye, mbatoma naye mbumba ipswa. Ndi pa mbumba yeneyi ipswa idadzabuluka Muomboli.

2. MBATIBVESERENI MAFALA A MULUNGU

Genesi 12, 1-7

Penepo Mbuya ampanga Abramam mbatu: "Siya dziko yako, siya mbumba yako na nyumba ya babako; ndoko ku dziko inadzakupangiza ine. Ndinadzakucita mbumba ikulu, ndinadzakupasa chidzo, mbandidzakuza dzina yako, iwembo mbudzakhala chidzo kuli anango. Ndinadzapasa chidzo ale anakupasa chidzo, ndinadzaonesa nyatwa ale anakuonesa nyatwa. Mbumba yonsene ya pantsi inadzapabswa cidzo na iwe". Abramam alamuka mbaenda ninga mudampangira Mbuya, pabodzi na Loti. Pidabuluka iye ku Harane, Abramam akhali na pyaka makumanomwe na pixanu pya kubalwa. Akwata Sarai, nkazache, na Loti, mwana wa m'bale wache, na pinthu pyonsene pikhali na iye, na adzakaze akhakhala na iye ku Harane, mbaenda onsene ku dziko ya Kanani. Abramam afamba mpaka ku mbuto ya Sikemu, mbafika ku mapiri a More. Mbumba ya Kanani ikhakhala ku dziko yeneyi ire. Mbuya aonekera kuna Abramam mbampangam mbatu: "Ndinadzapereka dziko ino kuli adzukulu ako". Abramam amanga guwa kuli Mbuya akhadamuonekera.

3. MBATIBVESERENI MAFALA AWA

Mulungu ndi adatoma kucemera Abramam, mbamphemba kubuluka ku dziko kwache. Na tenepa Abramam atawira kuchemerwa na Mulungu maseze nee kudziwako kukhafuna iye kuenda na Mbuya. Chikhulu-piro na kuperekeka kweneko kwa Abramam ndi kunacemerwa kutawira. Pidacheremwa iye Abramam nee hakhali na mwana tayu. Maseze na mwenemo, Mulungu ampanga kuti anache anadzaakhalisa mbumba ikulu. Abramam apitawira, ande, kuli Mulungu. Kutawira kwache Abramam, ndi chisandzo chathu kuli ife tonsene anyakutawira.

4. MBATIBVESERENI MAFALA AWA

Mbuya ampanga Abramam mbatu: " Siya dziko yako, siya mbumba yako na nyumba ya babako; ndoko ku dziko inadzakupangisa ine. Ndinadzakuchita mbumba ikulu."

5. MBATITOWEDZENI MAFALA AWA

Lero, Mulungu asathimiza kulonga m'mitima mwathu. Mbatisalakaneni machemerero ache akusina-siyana. Ninga mudapangira iye Abramam, iye asatiphemba tisiye ipi: - Makhaliro akusandzaya,

- Pinango pidadzolowera ife / myambo
- Madzolowero athu akwipa
- Penochisa chathu peno dziko yathu

Piripo pinthu pinango pinatongwa ife kuphinduza mu ntima mwathu na m'makhaliro mwathu ninga Abramam; Mulungu asatiphemba tin'khulupire mbatintowera mu njira yakukhonda kudziwika. Pyenepi ndiko kutawira.


6. TIPHEMBE

Mulungu wa Abramam na Mulungu wathu. Manyerezzerero athu mazinji asatikhalisa kutali na imwe. Pinthu pizinji pisatiphingiza kubva Mafala anu. Bulusani pire pinatiphingiza na kufungula ntima wathu. Pakumala kubva kutichemera kwanu, mutipase mphambvu za kusiya pyakuipa na kutiikha mu njira ya kutawira na kukhulupirira. Amen

MAKUMBUKIRO A MAPFUNDZISIRO

1. Abramam mbadzati, athu akhadziwa Mulungu wamaso? **R/ Nkhabe, Iwo akhalambira alungu a pezi.**
2. Mbuya ampanganji Abramam? **R/ Siya dziko yako na nyumba ya babako.**
3. Abramam achitanji pidafika iye ku Sikemu towera kuchita Mulungu takhuta? **R/ Amanga guwa kuli Mbuya**
4. Abramam asiya dziko yache baenda ku dziko inankhonda iye kuidziwa. Thangwi yanji ayenda? **R/ Thangwi iye ali na chikhulupiro.**
5. Abramam akhali na ana? **R/ Nkhabe**
6. Mphapo Mulungu ampanganji? **R/ Ana ako anadzakhala mbumba ikulu.**

ABRAMU NA ISAKI



**«Leka kupha mwana tayu! Chinchino
ndapidziwakuti wagopa Mulungu than-
gwi wachimwana kundikhondera
Mwana wako mbodzi ekha»**

2. NTSEMBE YA ISAKI

Makumbukiro a mapfundziro a nduli

1. MBATISASANYIKENI TOWERA KUTAMBIRA MAFALA A MULUNGU

Abramu ndi nkhalamba nkazi wache Sarai asabala tayu. Iwo née hakhali na ana. Masezi ya ipyo Mulungu athimiza kumpikira kuti dzindza yako inadzanjipa (Gn 15, 5). Abramu abala mwana na bichu wache wa mu Egipitu, Agare, dzina yache ndi Ismaele (Gn 16, 15), makholo a mamusulmano. Mbwenye mwana wakupikirwa anadzabaliwa na Sarai, masezi akhale nkhalamba. Mwana uyu wakupikirwa Abramu anadzanthula Izaki (Gn 21, 5). Mulungu alesera Abramu kutawira kwache. Iye aphemba kuikhira ntsembe ya mwana wache m'bo-dzi ekha, ule anadzabala mbumba yakupikirwa.

2. MBATIBVESERENI MAFALA A MULUNGU Genesi 22, 1-18

Pidamala ndzidzi pang'ono, Mulungu alesera Abramu, mbanchemera: "Abramu?" Iye antawira mbati: "Ndiri pano". Penepo Mulungu ati: "Kwata mwanako, mwanako wenewu mbodzi ene, anafuna iwe maka, Izaki, mbuenda ku dziko ya Morya; kweneko unadzandiyikhira ntsembe, mbundiphera mwanako pa phiri inafuna kukupangiza ine". Mangwana mwache na machibese ene, Abramu asasanyira buro yache; penepo akwata adzakaze ache awiri, pabodzi pene na mwanache Izaki, apandula nkhuhi, towera kupisa nazo ntsembe, mbafamba na njira ya kuenda ku mbuto idapangwa iye na Mulungu. Pa ntsiku yachitatu ya ulendo alamusa maso ache, mbaiona na kutali mbuto ikhadapangwa iye. Penepo apanga adzakaze ache kuti: "Khalani pano na buro; ine na mwananga tiri kuenda kule, kaphembera; tingamala, tinadzabwerera kuna imwe". Abramu akwata nkhuhi za ntsembe mbazithukisa mwanache Izaki; iye, babache, akwata moto na mpeni, mbaenda onsene pabodzi pene. Penepo Izaki abvundza babache kuti: "Baba". Iye antawira kuti: "Unafunanji mwananga?" Izaki ati: "Takwata moto na nkhuhi; bira yache iri kupi towera kuyikha ntsembe?" Abramu antawira mbati: "Mulungu ndiye anadzatipasa mwanabira wa ntsembe yache, mwananga". Na tenepa mbaenda uwiri wawo. Pidafika iwo pa mbuto ikhadapangiwa iwo na Mulungu, Abramu asasanya guwa ya ntsembe, apakapo nkhuhi, adzamale amanga mwanache Izaki, mbamuyikha padzulu pa nkhuhi za ntsembe. Akwata mpeni mbathukula nkono wache towera kucheka mwanache. Mbwenye penepo, Nzimu wa Mbuya wakuwa kudzulu: "Abramu, Abramu?" Iye atawira mbati: "Ndiri pano".

Penepo Nzimu wampanga kuti: "Leka thukula dzanja yako kuli mwana tayu, leka kumupha tayu, cincino ndapidziwadi kuti wagopa Mulungu, thangwi wachimwana kundikhondera mwana wako mbodzi ekha". Penepo, mphapo, Abramu alamusa maso ache, mbaona ku nduli kwache mwanabira waku-sakama na nyanga zace pa thendere ya minga. Penepo aenda kankwata mbapereka nawo ntsembe pa mbuto ya mwanache. Abramu athula dzina ya mbuto yeneyo kuti: "Mulungu anadzaona"; na lero ene pialongwa kuti: "Pa phiri Mbuya anadzaona". Nzimu wa Mulungu wachemera Abramu kachiwiri kubulukira kudzulu. Mbampanga kuti: "Ndiri kudumbira, inene kakamwe, alonga Mulungu, thangwi ya machitiro ako awa, na thangwi ya kuleka kundikhondera mwanako, mwanako mbodzi ekha, kuti ndinadzakupasa ufulu mbandiyanjipisa mbumba yako ninga nyenyezi za kudzulu, ningambo tchecha ya ku nyandza. Iyo inadzangonjesa misuwo ya anyamalwa ache. Mbumba zonsene za pantsi pano zinadzapabswa ufulu mwa dzindza yako, thangwi watawira fala yanga".

3. MBATIBVESERENI MAFALA AWA

Mulungu aphemba Abramu pinthu pyakunensa, mbwenye Abramu apitawira. Abramu adziwa mwanasangasanga kuti Mulungu hasafuna ntsembe za kupha munthu tayu, ninga mukhachitira madzindza a pa chipfupi. Mulungu hasafuna chiropa tayu nee uthabuki, pinafuna iye ndi kufunana na moyo. Mulungu hasafuna uthabuki tayu nee kufa mbwenye ntsiku ibodzi iye adzatawira kufa kwa mwanache mbodzi ekha basi, Yezu, adapereka moyo wache na ntima wache wonsene thangwi ya kufuna anthu.

4. MBATIYIKHENI MU NSOLO MWATHU MAFALA AWA

"Mulungu apanga Abramu: Leka kupha mwana. Chinchino ndapidziwa kuti wagopa Mulungu. Wachimwana kundikhondera mwana wako".

5. MBATITOWEDZENI MAFALA AWA

Ndi pinthu pipi pyakunensa, pinatawira ife na kufuna kwathu konsene towera kukhalikira mu uxamwali na Mulungu mbatithimidza kufamba na Iye?

6. TIPHEMBE

Mbuya, tipfundziseni towera tifambe pabodzi na imwe mu njira yanu ntsiku zonsene. Tipfundziseni kuthabuka pabodzi na imwe. Tipfundziseni kutawira née kunkhonda. Amem!

MAKUMBUKIRO A MAPFUNDZISIRO

1. Mbani na ani ana awiri a Abramu? **R/ Ismaele na Isaki**
2. Mbani mwa iwo onsene Mwana wakupikirwa? **R/ Ndi Isaki**
3. Ndi chinthu chanji chakunetsa chidaphembwa Abramu na Mulungu? **R/ Kupha Mwana wache**
4. Thangwi yanji Abramu atawira pidam'phemba Mulungu masezi ndi pyakumentsa? **R/ Thangwi akhali na chikhupiriro**
5. Mulungu asafunanji; moyo peno kufa? **R/ Moyo**

ANJU ANATHIMBANA NA YAKOBE



**«Unadzathuliwabve yakobe tayu,
Unadzathuliwa Israele thangwi
wamenyana na Mulungu»**

3. YAKOBE ACHITA CHIBVERANO

Makumbukiro a mapfundziro a nduli

1. MBATISASANYIKENI TOWERA KUTAMBI-RA MAFALA A MULUNGU

Abramu mbadzati kufa, iye akhafuna tayu kuti Mwanache Izaki asembe nkazi wa mu Kanani., mule mu dziko ikhakhala iye (Gn 24, 3). Abram u atuma bitchu wache kasemba nkazi wa mwana wache Izaki ku dziko ya ababache. Bitchu ule ayenda mbabwera naye nkazi wa Izaki. Na tenepa Abram anafa mu ntendere. Iye awona pidapikira Mulungu kuti dzindza yako inadzanjipa. Izaki na Rebeka akhala na ana awiri Ezau na Yakobe. Ezau achitika nyakusodza wadidi wa chipapo. Yakobe akhali wakupfulika na wa pa nyumba towera kuwonera pifuyo (Gn 25, 27). Yakobe ndi waku-nama. Iye achita chibverano. Rebeka akhafuna maningi Yakobe, thangwi ya ipyo iye aphedza kuba chidzo cha Izaki, chikhafuna iye kupasa Izau, mbale wache wankulu (Gn 27, 1-27). Na than-gwi inei, Izau ali kufuna kupha Yakobe. Yakobe athawa. Iye athawira ku nyumba ya Labani mbale wa mache. Kweneko aphata basa pyaka pizinji towera kusemba Liya na Rakele. Pa kumala pyaka makumawiri, Yakobe abwerera. Pa njira Yakobe athimbana na Mulungu mbampasa dzina ipswa. Ndi penepo padapapswa Yakobe chidzo.

2. MBATIBVESERENI MAFALA A MULUNGU Genesi 32, 24-30 na 35, 11-12

Munthu mbodzi wakukhonda kudzuika kakamwe aoneka mbatoma kumenyana na Yakobe mpaka kucha kunja. Munthu na kuona kuti anacimwa-na kukunda Yakobe, ammenya pa mphindo ya nchafu yace, penepo pene nchafu yache Yakobe yagudumuka. Adzamale munthu ule ati: "Ndi-leke, ndibuluke chinchino, thangwi pantsi pamala kuca". Mbwenye Yakobe atawira mbati: "Sinaku-leka tayu, mbudzati kundipasa chidzo". Munthu ambvundza mbati: "Dzina yako ndiwe ani?" Yakobe atawira, mbati: "Ndine Yakobe". Penepo munthu ati: "Kutsogolo hunadzathulwabve Yakobe tayu; unadzathulwa Israele, thangwi wamenya-na na Mulungu na anthumbo, mbuwaakunda". Yakobe alonga mbati: "Ndipange chinchino dzi-na yako". Mbwenye munthu ambvundza mbati: "Unafuniranjiki kudziwa dzina yanga?" Pidamala iye kumbvundza Yakobe ipi, ampasa chidzo.

Mulungu athimiza, mbati: "Ine ndine Mulungu wakukwanisa pyonsene. Khala na adzukuluma-ningi. Unadzakhala baba wa mbumba zizinji; na amambo ene anadzabuluka mwa iwe. Dziko ino, idapasa ine Abram na Izaki, ndinadzaipasa iwe na adzukuluma ako".

3. MBATIBVESERENI MAFALA AWA

Yakobe akhali mphale wakunyengeta. Iye akha-longa uthambi mbanyengeza. Iye akhachita ipi pyonsene, towera akhale mbuto yakutoma, ukulu na ufumi. Pithankhano ipi pya m'biblya si towera kutipfundisa kunyengeta tayu. Pikhafuna kutipan-giza kuti Mulungu asachemera munthu anafuna iye, maseze anthu akhale na chibanya na madawo m' mitima. Mulungu asankhula anafuna iye mba-chita naye chibverano. Mulungu asathimiza kuti-funa. Na kupirira kwache anaphindudza ntima wa munthu wakuipa. Yakobe hadafuna kudzikira kudawisa kwache tayu. Iye achita nthonga masiku amumphu. Nthonga yeneyi, ndi ninga kumenyana kwa pyakuipa na pyadidi pya mu ntima. Pa kudoka kwa dzuwa, Yakobe adziwa kuti pyacitika pinthu kuli iye na Mulungu. Ntima wache waphindukira-tu, mbaenda kaonana na m'bale wache Izau. Iye akhafuna kulekerwa. Mulungu apanga Yakobe kuti ndinakhala na iwe. Patsogolo pache, Yezu, mwana wa Mulungu mbodzi ekha basi anadzachita nkondo na Sathani mbadzawina, mbadzati kutoma na basa yache ya chibverano chipswa.

4. MBATIYIKHENI MU NSOLO MWATHU MAFALA AWA

"Unadzathuliwabve Yakobe tayu, Unadzathuliwa Israele thangwi wamenyana na Mulungu"

5. MBATITOWEDZENI MAFALA AWA

Pya nthonga iyi ya Yakobe na Anju wa Mulungu, ndi nthonga ya munthu na munthu mwa ife anafuna kukhala na chibverano na Mulungu. Nkhondo ipi ? Chibverano chipi?

6. TIPHEMBE

Mbuya, tipaseni chipapo na Mphambvu ya ku-menyana na pyakuipa pyonsene mwa ife. Bwerani kuna ife. Mwa imwe, tinakunda. Ife tinafuna kukhala chinthu chibodzi na imwe. Makumbukiro a mapfundzisiro Amen

MAKUMBUKIRO A MAPFUNDZISIRO

1. Dzina yache mbani nkazi wa Izaki? **R/ Rebeka**
2. Mbani na wani ana awiri a Izaki na Rebeka? **R/ Izau na Yakobe**
3. Yakobe ndi munthu wadidi. Ndimomwene peno nkhaba? **R/ Nkhabe, iye ndi wauthambi na wakumalisa anthu**
4. Mulungu asankhula Yakobe? Thangwi yanji? **R/ Ande, Mulungu asankhula Yakobe than-gwi iye anafuna.**
5. Yakobe amenyana na munthu mpaka kucha kunja mbadzati kugumana na mbale wache. Longa pyachitika tani...

ZUZE ADZINDIKIRA ABALE ACHE



**«Mulungu andituma
kuno towera ndikupulumuseni»**

4. ZUZE NA ABALE ACHE KU EGITO

Makumbukiro a mapfundziro a nduli

1. MBATISASANYIKENI TOWERA KUTAMBIRA MAFALA A MULUNGU

Yakobe ali na ana khumi na awiri (12). Mbodzi mwa iwo dzina yache ndi Zuze. Yakobe akhafuna maka Zuze mwa ana ache onsene. Ndi thangwi yache abale ache akhachita bibvu na Zuze. Ntsiku ibodzi abale ache Zuze anyerezera kupha. Iwo agulise Zuze na nyamalonda wa dziko inango: ya Egito (ku ukwiriro kwa Afrika). Abale ache Zuze abwerera ku nyumba mbafokotozera pai wawo kuti Zuze alumwa na chikala. Mu Egito, Zuze akwiziwa mpando wa kuphatira basa mambo, Farao, Iye Farao akomerwa maningi na basa na nzeru na udziwisi wa Zuze. Farao akhulupira Zuze mbankwiza kukhala ntongi wa nyumba yache. Pa pyaka pya ndimo, phoso ya pyaka pya utende, yamala koiwa mpikwa ku mizindo yonsene ya Egito. Pikwa pikhali pyakudzala na phoso maningi kuti née pa pyaka pya njala iwo hanasowa phoso tayu. Na tenepa, Yakobe na dzinza yache pikhakhala iye mu kanani, dziko ya kuindikana na Egito, akhathabuka na njala. Pidabva Yakobe kuti ku Egipo kuli na phoso maningi iye atuma ana ache kagula phoso. Pa kufika kwawo iwo atambirirwa na Zuze mbwenye iwo hadadzindikira tayu kuti ndi mbale wawo. Iye ene Zuze adzindikirisa. Iwo abale ache adzindikira mbaphemba kulekerwa na Zuze pyakuipa pidachita iwo. Zuze aalekera.

2. MBATIBVESERENI MAFALA A MULUNGU Genesi 45 na 46.

Pa kupita midzidzi midzinji, mbafuna kuonekera, Zuze achimwana kuphopa mulomo pa maso pa ale akhadanzungulira, na tenepa alonga: "Abulusiseni anthu onsene pano!" Thangwi ya ipyo, hapadasala munthu tayu, pa ndzidzi udadzindikirika iye kuli abale ace. Mphapo iye agaluza fala, mbalira mpaka kubvekera kuna anthu a Egito na ku nyumba kwa Farao ene. Zuze alonga mphapo kuna abale ache kuti: "Ine ndine Zuze, babanga achiri m' maso?" Mbwenye iwo achimwana kuntawira, thangwi adzumatirwa pa maso pache. Zuze alonga kuna abale ache: "Ndifendezereni, ndisakuphembani!" Iwo anfendezerwa. Zuze athimiza kulonga: "Ine ndine Zuze, m'bale wanu adagulisemwe towera aendebse ku Egito. Pa chinchino, lekani kutsukwala, lekani longana, thangwi ya pidandigulisa imwe mbandidza dziko ino; thangwi ndi kufuna kupulumusa moyo wanu kudandidzesa Mbuya kuno, panandiona imwe. Chinchino pyapita pyaka piwiri pya njala n' dziko ino yonsene; pa pyaka pixanu pontho nee panadzaoneka anthu kulima nee kubvuna. Mbuya andituma patsogolo panu, towera ndikusasanyireni

mbuto ya kuthawira n' dziko muno, towera akupulumuseni mbakukoyerani moyo mwadidi. Nkhabe, simwe tayu mudandidzesa kuno. Ndi Mulungu; ndiye adandikhalisa baba wa Farau, na nfumo, na muimiriri wa dziko yonsene ya Egito. Chimbizani mubwerere kuna babanga mukampange: mwanako Zuze alonga tenepa: Mulungu andichita mbuya wa Egito yonsene. Bwera kuna ine nsanga-nsanga! Unadzakhala mu ndzinda wa Geseni, duzi na ine; iwe na anako, ana a anako, pifuyo pyako ping'ono na pikulu na pyonsene pina iwe. Kwenekule ndinadzakusasanyira, thangwi pa pyaka pixanu panadzaoneka njala; towera ukhonde kuona nyatwa iwe, mbumba yako na pyako pyonsene.

3. MBATIBVESERENI MAFALA AWA

Abale ace Zuze mba anyabibvu. Na bibvu yawo agulisa m'bale wawo towera akhale na kobiri, Yezu agulibswambo na xamwali wache. Zuze adzindikira abale ache mbaatambira. Zuze apulumusa abaleache si thangwi ya njala basi tayu mbwenye aalekera pidacita iwo. Yezu, pa ntanda analekera anyakuipa mbapuluma mbumba m' madawo. Na pidachitwa na Zuze, Mulungu awangisa Yakobe, nyauthaka wa Mbumba yache, idapikirira iye babache Izaki. Leka kugopa kuenda ku Egito. Kweneko anako anadzainjipa. Ine ndinadzakhala na iwe. Ana khumi na awiri a Yakobe anadzakhala atsogoleri a mbumba ya Israele. Yezu asankhula apostolo khumi na awiri towera kumanga gereja, mbumba ipswa ya Mulungu.

4. MBATIYIKHENI MU NSOLO MWATHU MAFALA AWA

Zuze ati: Ndi Mulungu andituma kuno towera ndikupulumumeni

5. MBATITOWEDZENI MAFALA AWA

Ntsiku zino, alipo anthu anachita pyakuipa thangwi ya bibvu peno ya kufuna kobiri. Ndi pinthu pyakusukwalisa pinachitika kuna makhaliro a anthu peno makhaliro a pa nsoka. Ndi ninji pinakwanisa ife kuchita? Ninga Zuze peno ninga Yezu towera kulekera anthu anewa? Lero Mulungu asakupanga: Leka kugopa, ine ndiri na iwe. Tingagopa tisatawira kuti Mulungu ali kutiperekerwa?


6. TIPHEMBE

Mbuya, kazinji kene imwe musachita pinalonga imwe. Imwe musatipanga: "Lekani kugopa, ndiri na imwe". Pa midzidzi ya kupoga imwe musakhala na ife. Mbwenye ife tisapiduala. Thimizani utawiri wathu kuli Mafala anu. Imwe ndimwe Mulungu masakoya kazinji kene Mafala anu. Ámen.

MAKUMBUKIRO A MAPFUNDZISIRO

1. Yakobe akhali na ana angasi? Longa mbodzi mwa iwo. **R/ Khumi na awiri; Zuze**
2. Ndi dziko ipi ikhakhala Zuze ninga ntongi? **R/ Egipo**
3. Mbani, ninga Zuze, agulisiwa na xamwali ache? **R/ Yesu.**
4. Zuze achitanji pidaona iye abale ache? **R/ Apanga kuti akakwate pai wawo abwere naye ku Egipito.**

MOSE PAKATI PA THENDERE



**«Ndoko ukabuluse mu Egito anthu anga.
Ine ndinadzakhala na iwe»**

5. MULUNGU ACHEMERA MOSE TOWERA KUWOMBOLA MBUMBA YACHE

Makumbukiro a mapfundziro a nduli

1. MBATISASANYIKENI TOWERA KUTAMBIRA MAFALA A MULUNGU

Ninga pidapikira Mulungu, adzukulula a Yakobe adzakhala azinji na amphambvu. Ndiwo asachemerwa Ahebere na Israele. Mambo unango mupswa apita pa mpando wa utongi mu Egito. Mbaotoma ubitchu wa a Israele. Mulungu na kuona ubitchu wa Ahebere iye anyerezera kuaphedza. Thangwi ya ipyo atuma Mose towera kuaombola. Mose ndi wa Ahebere iye abaliwa ku Egito. Iye apulumusiwa m'madzi na mwana wa nkazi wa Farao. Mose akula na Mambo Farao. Mbwenye ntsiku ibodzi iye abvunulira mu Ahebere mbodzi pa kubvunulira apha mu Egito. Ndipyo pidachitisa kuti iye athawe kwenda ku dziko inango ya kutali na Egito.

2. MBATIBVESERENI MAFALA A MULUNGU Eksodo 3, 1... 4,18

Mose akhakumbiza pifuyo pya tebwalace, Yetro, nyantsembe wa Madiani. Ntsiku ibodzi, pikhakumbiza iye pifuyo mpaka ku thando, afikira phiri ya Mulungu: Horebu. Penepo anju wa Mulungu amukokera pakati pa malirimi a moto pa thendere. Mose ayang'anisa, thendere yonsene ikhagaka, mbwenye iyo kupya nkhaba. Mbalonga ekhene: "Ndinati ndiyifendezere, ndichione pyadidi chipangizo chenechi cha kudzudzumisa: thangwi yangi thendere nkhaba kupya?" Mbuya Mulungu aona kuti iye akhadafika duzi towera kuti aonese; apo Mulungu anchemera pakati pa thendere: "Mose? Mose?" Iye atawira mbati: "Ndiri pano". Penepo Mulungu ampanga: "Leka fendezera duzi na pano tayu, dula nsapato za myendo yako, thangwi mbuto ina iwe ino, njakuchenebwa". Adzamale alonga: "Ine ndine Mulungu wa baba wako, Mulungu wa Abramu, wa Izaki na wa Yakobe". Penepo Mose abisa nkhope yache, thangwi akhagopa kunyang'ana Mulungu. Mbuya athimiza: "Ine ndaona kusanyika kwa mbumba yanga mu Egito, na kukhuwa kwayo, thangwi ya athabusi awo. Ndaona kubva kwawo kupha. Ndatchita ndisafuna kuti ndiaombole ana a Israele m'manja mwa aEgito (...). Ndoko na kuabulusa n'dziko ya Egito (...). Mose atawira: "Iwo nkhaba kundibvera, anadzalonga kuti Mbuya hadandibulukira tayu". Mbuya ambvundza: "Ninji pina iwe m'manja mwako?" Iye antawira: "Ndi mpswimbo". Mulungu ampanga mbati: "Taya pantsi". Iye ataya pantsi mpswimbo mbisanduka kudza nyoka; na kuona, Mose athawa. Mulungu ampanga mbati: "Thasika dzanja yako mbuphata ncira wache". Mose athasika dzanja yache mbaiphata, nyoka yasanduka pontho kudza mpswimbo m'manja mwace. "Unadzachita pinthu ipi pyonsene towera iwo atawire kuti Mbuya Mulungu wa ababawo, Mulungu wa Abramu, wa Izaki na wa Yakobe, akubulukiradi". Mulungu athimiza mbati: "Ikha dzanja yako pa nthimanzi". Iye ayikha pa nthimanzi; pa

kubulusa, iyo ikhadagudumirwa na matanya akuchena ninga matalala. Mbuya ampanga mbati: "Pitisa papswa dzanja pa nthimanzi". Iye apitisa pontho pa nthimanzi. Pa kuibulusa, dzanja yakhalala pontho na nyama yache ninga mwa kale. "Iwo angakhonda kukutawira, na chirengo chakutoma, anadzadzindikira mbakutawira na chachiwiri. Angakhonda kutawira na pirengo pyenepi piwiri, angakhonda kukubvera, unadzaenda kakwata madzi ku nyandza mbudzakapira pa mataka, madzi anewa anadzachinjika kudza chiropa pa mataka". Mose alonga kuli Mbuya: "Ndimo Mbuya! mbwenye ine sine munthu wakukwanisa mwa nsanga kulonga fala; ndidzati kupichita ine pyenepi; nee dzulo, nee dzana; na n'ndzidzi uno ene unalongemwe na ntumiki wanu, ndina mulomo na lirimi yakumangika". Mbuya ampanga mbati: "Mbani adapasa mulomo munthu? Mbani adachita bewewe, nkhutwe, munthu wa kuona na zimola? Sine tayu, Mulungu? Ndoko, mphapo; ine ndinadzakhala na iwe ungalonga mbandikupfundzisa pinafuna dzalonga iwe". Mose alonga: "Ndimo! Mbuya, pasani basa yenyeyi munthu unango".

3. MBATIBVESERENI MAFALA AWA

Mulungu aona kuthabuka kwa mbumba yache, aibvera ntsisi mbafuna kuichitira pinthu. Thangwi ya ipyo achemera munthu towera aphate naye basa. Munthu wenewu ndi Mose. Mulungu achemera Mose mbantuma kaombola abale ache mu udzakaze wa mu Egito. Mose adziwa ufewi wache. Agopa mbafuna kuti Mulungu asankhule munthu unango. Mbwenye Mulungu ampanga kuti ndinakhala na iwe. Ndinakuikhira mafala anafuna kulonga iwe n'kanwa mwako. Mose akhulupira Mulungu mbaenda ku Egito na mphambvu za Mulungu. Patsogolo pache Mulungu atuma mwanache towera kuombola pya udzakaze onsene. Lero, Mulungu asafuna ife towera kuombola abale athu mbatichemera ninga Mose. Mbwenye kazinji kene pisanesa kupitawira, ande, machemerero a

Mulungu. Mbwenye Mulungu kazinji kene ali na ife mbatipasa mphambvu zache, mphambvu za Nzimu Wakuchena.

4. MBATIYIKHENI MU NSOLO MWATHU MAFALA AWA

"Mulungu ati kuli Mose: 'Ndoko kabuluse mu Egito anthu anga ine ndinadzakhala na

5. MBATITOWEDZENI MAFALA AWA

Mbapi mathabuko na pya udzakaze pinaona Mulungu lero nkundu mwathu? Tiri dzololo towera kuphatira basa Mulungu ya kuombola dziko? Tani ?


6. TIPHEMBE

Mbuya, imwe musandichemera! Imwe musandifuna. Imwe musandituma kuli abale anga. Mundipase chipapo chakutawira "ANDE". Imwe musandipasa mphambvu yanu. Imwe musandipanga "Ndiri na iwe"! Amen

MAKUMBUKIRO A MAPFUNDZISIRO

1. Asachemerwa tani adzukulula a Yakobe? **R/ Ahebere peno a Israele.**
2. Mose mbani? **R/ Ndi Ahebere abaliwa mu Egito, achemerwa na Mulungu towera kuwombola Ahebere abitchu**
3. Mulungu achemera tani Mose? ... Longa kuchemeriwa kwa Mose.
4. Mulungu asaona? R/ Ande. Mulungu asaona nyatwa yathu? **R/ Ande.**
5. Mulungu asachita tani kuti ale hanandziwa tayu towera adziwe? **R/ Na mafala na amboni anachemera Mulungu mbaatuma.**

KUDYA KWAKUMALISA MU EGITO



**«Ndi Paskwa: Mbuya apita
towera atipulumuse»**

6. CHAKUDYA CHIPSWA CHA ANA A ISRAELE

Makumbukiro a mapfundziro a nduli

1. MBATISASANYIKENI TOWERA KUTAMBIRA MAFALA A MULUNGU

Mulungu atuma Mose kalonga kuli Farao, Mambo wa mu Egito, kuti asiye mbumba yache. Farao masezi aone nyatwa na mikanzo iye akhonda mbathamangira Mose na Aaroni. Mulungu anyerezera mphapo kupanga Mose njira ya kusasanyira towera abuluke: Paskwa.

2. MBATIBVESERENI MAFALA A MULUNGU Eksodo 12

Mbuya alonga kuli Mose na Arau ku Egito, mbati: "Mwezi uno unadzakhala wakutoma wa chaka kuli imwe. Dziwisani nsoka wonsene wa aisraele mbaumuti: `Pa ntsiku yachikhumi ya mwezi uno, amuna onsene, munthu munthu, asakire banjace mwanabira peno mbuzi. Banja ingachepa, igawane na indzache, yakuindikana naye chinyama chibodzi cene, ninga munafunikira ipyo, towera mumale kuchidya. Mwanabira aleke kukhala na chibanya tayu, akhale wachimuna na wa chaka chibodzi. Kukwata bira peno mbuzi ndi sawa-sawa. Ingafika ntsiku yachikhumi na yachinai ya mwezi, na mawulo, aisraele onsene agumanyikane towera kupha chinyama chire. Angamala, akwate chiropa chache, mbakhwaza nacho nchichi za misuwo, na makhasa a nyumba zonsene, munadiwa pinyama. Masiku anewo ene, iwo asatongwa kudya nyama yakuochoa pa moto, na mikate yakukhonda pfufuma, na masambambo akuwawa. Lekani kudya iwisi, peno yakuphikwa, tayu. Idyeni yonsene yakuochoa pa moto: nsolo, myendo na pya m'mimba pyene. Nkhabe phindi ibodzi inafuna kukoyerwa mangwana mwache. Pinasalira pire, pipiseni na machibese ene. Munadya tenepa: munabvala chiulendo, na pigorowa m'manyalo, na mpswimbombo m'manja. Munadya na kuchimbiza, thangwi ndi Paskwa ya Mbuya. Masiku anewo ndinadzafambira dziko yonsene ya Egito, mbandipha ana onsene a utombo, kutomera anthu mpaka pinyama, mbandionesa nyatwa alungu onsene aEgito. Ine ndine Mbuya. Ndingadzaonesa aEgito nyatwa, chiropa chiri pa nyumba zanu, chinadzakhala chidzindikiro cha kuti imwe muli penepo. Na kuona chiropa chenechi, ndinadzaenda kutsogolo, nee kukukhuyani na muliri tayu. Ntsiku yeneyo inadzakhalala ya phwando kuna imwe, towera kukumbuka, ubalwi na ubalwi, pidachita ine, Mbuya. Inadzakhala ntsiku ya phwando ya kuenda na kuenda". Mbuya ati: "Pa ntsiku zinomwe munadzadya nkate wakukhonda pfufuma. Kutomera ntsiku yakutoma, munadzabulusa nsunga wonsene n'nyumba mwanu. Pa ntsiku zenezo zinomwe, ule anadya nkate wakupfufuma, anadzabulubswa pa mbumba ya aisraele. Ntsiku yakutoma na yachinomwe munadzagumanyikana. Ntsiku zenezo nkhaba basa,

kupambula basa yakuphika chakudya, chinafunika kuli imwe. Chaka na chaka munadzadya phwando iyi ya mikate yakukhonda pfufuma, towera kukumbuka ntsiku idabulusa ine madzindza anu ku Egito. Koyani phwando iyi, ubalwi na ubalwi; ndi matongerero a kuenda na kuenda. Mphapo mwezi wakutoma, kutomera ntsiku yachikhumi na yachinai, na mawulo, mpaka ntsiku yachimakumawiri na chibodzi, na mawulo, munatongwa kudya nkate wakukhonda pfufuma. Pa ntsiku zenezo zinomwe nkhaba kwoneka nsunga n'nyumba mwanu. Munthu mbodzi, mu Israele, peno nyakudza, angadya chakudya chakupfufuma, anadzabulubswa pa mbumba ya Israele. Mphapo, lekani kudya chinthu chakupfufuma tayu, kwonsene kwene kunakhala imwe, munadzadya nkate wakukhonda pfufuma basi". Penepo Mose achemera atsogoleri onsene a Israele, mbati kuli iwo: "Munthu munthu mwa imwe aende kakwata mwanabira peno mwanambuzi, mbamupha, towera kudya phwando ya Paskwa na banjache. Chiropa chache achiyikhe m'phande, akwate tsandzo ya mpswairo, aibvike n'chiropa, mbakhwaza na chiropa nchichi za nsuwo na makhasa a nyumba yache. Kutomera penepo mpaka kucha kunja, nee munthu mbodzi abuluke n'nyumba mwache tayu!-Thangwi Mbuya anadzafambira dziko yonsene, towera kuonesa aEgito nyatwa. Mbwenye, na kuona chiropa, chiri pa nchichi za nsuwo na pa makhasa a nyumba zanu, iye anadzaenda kutsogolo, nee kutawira kuti anju wakupha apite n'nyumba mwanu mbakuphani.

3. MBATIBVESERENI MAFALA AWA

Ana a Israele anasasanyira pya mabulukiro a mu Egito mbasogolerwa na Mose. Mbwenye mbadzati kubuluka adya mwanabira. Pyaka pyonsene asachita pibodzi pene towera kukumbukira kubuluka kwawo mu Egito, pyenepi ndi paskwa ya Ayuda. Kuli ife akristu, mwanabira wathu wa paskwa ndi Yezu Kristu, Mwana wa Mulungu. Iye atifera ndi chidzindikiro cha chibverano chipswa kuli Mulungu na ife. Yezu pa kufa pa ntanda mbalamuka muli akufa, atipasa moyo. Misa zonsene chinachitika ndi chikumbukiro cha phwando ya Paskwa yakumalisa ya Yezu na anyakupfundza ache lero.

4. MBATIYIKHENI MU NSOLO MWATHU MAFALA AWA

Ndi Paskwa: Mbuya apita towera kutipulumusa 5. MBATITOWEDZENI MAFALA AWA Tiri kusasanyira tani batismo yathu? Yeneyi ndi paskwambo yathu


6. TIPHEMBE

Ndinakuchitani takhuta Mbuya, thangwi ndingakuchemerani musandibvesera. Imwe musathimiza pa moyo wanga kupita na pana ine. Imwe musanditsogolera na kundipasa mphanbvu. Amen

MAKUMBUKIRO A MAPFUNDZISIRO

1. Mbani aphemba Farao kuti asiye ana a Israele mu dziko ya ubitchu? **R/ Mose na mbale wache Aaron.**
2. Ndi nyama yanji ikhafunika kuphiwa towera kudya pa Paskwa? **R/ Mwana mphulu wa bira peno wa mbuzi.**
3. Ndi thangwi yanji a Israele akhachita Paskwa pyaka pyonsene? **R/ Towera kukumbukira kuomboliwa kwa mu Egito.**
4. Kuli ife akristu mbani bira ya Paskwa? **R/ Ndi Yezu Mwana wa Mulungu.**
5. Misa isatikumbusanji? **R/ Phwando ya Paskwa ya Yesu (Pyakubisala pya Paskwa).**

KUWAMBUKA BARA YAKUFWIRA



«... A Israele awambuka BARA yakufwira. Na tenepa tsiku inei Mbuya apulumusa a Israele ku Egito»

7. KUWAMBUKA BARA YAKUFWIRA: EKSODO

Makumbukiro a mapfundziro a nduli

1. MBATISASANYIKENI TOWERA KUTAMBIRA MAFALAA MULUNGU

Mbumba ya Ahebere ya siya dziko ya Egito, dziko ya ubitchu mbatsogolerwa na Mose. Pidabva Farao kuti a Israele athawa, iye achemera anyankhondo ache onsene towera kuathamangira. Na mphambvu za mahachi awo onsene, ngolo zawo na anyankhondo awo athamangira a Ahebere ale adafamba na masiku mpaka kucha kunja. Pidafika iwo ku bara yakufwira iwo aona kuti nkhaba njira kutsogolo kwawo. Akhala ninga akutaika mbasowa njira. Na kugopa, adungunyira Mose mbansumira.

2. MBATIBVESERENI MAFALA A MULUNGU Eksodo 14, 1-14. 15-16. 26-29 à 15, 1.

Mbuya ati kuli Mose: "Panga aisraele kuti abwere nduli pang'ono mbadzati kufikira Pi-Hahiroti, mbamange misasa yawo pakati pa Migodole na pa bara. Nkhweneko kunadzagana iwo, akuyang'ana Beelsefoni, duzi na bara. Angachita tenepa, Farao anadzanyerezera kuti aizraeli ataya njira, mbafungirwa na thando ya macheca. Ine ndinadzaumisa ntima wa Farao, towera akuthamangireni. Mbwenye ndinadzaonesha mbiri yanga, na kuntapata iye na anyankhondo ache onsene. Adzamale aEgito anadzadziwa kuti ine ndine Mbuya". Aisraele achita pikhadapangwa iwo. Pidabva Farao kuti aisraele athawa, iye na mafumu ache achinyuka, mbati: "Takwanisa tani kwaaleka aisraele mbaenda pyawo? Chinchino tasowa adzakaze!" Na tenepa Farao amangisa ngolo yache, mbachemera anyankhondo ache onsene. Akwatambo ngolo zonsene za ku Egito, makamaka ngolo zire madzana matanthatu zakusankhulwa, ibodzi-bodzi na anthu ache. Thangwi Yahve akhadaumisa pontho ntima wa Farao, mambo wa ku Egito, towera athamangire aisraele. Mbwenye iwo, na chikhulupiriko, athimiza ulendo wawo. Aegito atoma kuthamangira aisraele, na mphambvu za mahaji awo onsene, ngolo zawo na anyankhondo awo, mbaaphata pa gombe ya bara, pakhadamanga iwo misasa yawo, duzi na Pi-Hahiroti na Beelsefone. Apo, iwo, na kuona kuti Farao na aEgito ali duzi, agopa pikulu pyene, mbakhuwa kuna Mbuya, towera aaphedze. Penepo iwo ambvundza Mose, mbati: "Kodi, mwatibulusa ku Egito, towera tife kuno, n'thando? Kodi, hakukhali nthumbi ku Egito tayu? Yang'anani pidachita imwe na kutibulusa kwenekule! Takupangani kale ku Egito kuti: mutileke mu ntendere; ife tisafuna kudzakazera aEgito: mphyadidi kukhala ntumiki

ku Egito kupita kufa n'thando". Mose atawira, mbati: "Lekani kugopa! Pfulikani! Munaona kuti, lero ene, Mbuya anakupulumusani. Ndimo mwene, aEgito anaona imwe chinchino, chipo munadzaaona pontho. Mbuya ndiye anakumenyerani nkondo. Mphapo, lekani kudzudzumika tayu!" Mbuya ati kuli Mose: Unandi phemberanji uphedzi? Apange Aisraele kuti aende kutsogolo. Kwata mpsimbo m'manja mwako, mbuthasika pa bara. Penepo pene madzi anadzagawika pakati towera aisraeli akwanise kuambuka bara nee kutota, nee na manyalo ene. (...), madzi abidze aegito na ngolo zawo, na anyakutekenya awo. Mose athasika manjache pa bara. Pa kucha kunja, mukathawa aegipitu, madzi abwererana pontho ninga mwa kale, mbabidza ngolo, anyakutekenya awo na anyankhondo aegito onsene akadhathamangira aisraele m'bara; nee mbodzi wawo adapulumuka tayu! Mbwenye aisraele afamba na myendo pakati pa bara, pa kuwuma, madzi mbali ninga nkhomole nkono wa madyo na wa bwere. Penepo, Mose na aisraele aimbira mbuya nyimbo mbapereka takhuta na kusimba.

3. MBATIBVESERENI MAFALA AWA

Ahebereu hakhadzowera tayu kutawira Mulungu. Hakhadadzati kundziwa. Agopa mbafuna kubwerera nduli mu udzakaze, Mbuya mbaapulumusana. Lero ife ndifembo ninga ana Israele. Tisatoma kutowera mafala a Mulungu mbatisiya pidadzowera ife kuchita towera kutowedza njira ipswa. Aisraele apita na m'madzi mwa kufa mbwenye na nkhombo za Mulungu abuluka ammaso na akuwombokwa. Njira yeneyi ndi njira idapita na Yezu, pa kufa na pa kulamuka muli akufa. Ndiyombo njira ya nkristu, pabodzi na Kristu anapita na pa madzi a batismo towera kuenda ku moyo upswa.

4. MBATIYIKHENI MU NSOLO MWATHU MAFALA AWA

"... Aisraele awambuka bara yakufwira. Ntsiku inei, Mulungu apulumusa a Israele mu Egito".

5. MBATITOWEDZENI MAFALA AWA

Ndi pyakunensa pyanji na pinatidzudzumisa pa moyo wathu towera tisiye kukhala akristu? Ndi ninji pinafuna ife kunyerezera peno kuchita pa pyenepi pinatidzudzumisa?

6. TIPHEMBE

Tonsene tiimbe nyimbo ya Israele ya kuchita takhuta Mulungu. Eksodo 15 (cfr. pag. 43).


MAKUMBUKIRO A MAPFUNDZISIRO

1. Asachemerwa tani adzukulu a Yakobe? **R/ Ahebere peno a Israele.**
2. Mose mbani? **R/ Ndi Ahebere abaliwa mu Egito, achemerwa na Mulungu towera kuwonbola Ahebere abitchu**
3. Mulungu achemera tani Mose? ... Longa kuchemeriwa kwa Mose.
4. Mulungu asaona? **R/ Ande. Mulungu asaona nyatwa yathu? R/ Ande.**
5. Mulungu asachita tani kuti ale hanandziwa tayu towera adziwe? **R/ Na mafala na amboni ana-chemera Mulungu mbaatuma.**



Maná

Água



**«Ao crepusculo comereis carne,
e pela manhã saciar-vos-ei de pão,
e conhecereis que Eu sou o Senhor»**

8. MBUMBA N'THANDO: MADZI, MANA, MAYESERO

Makumbukiro a mapfundziro a nduli

1. MBATISASANYIKENI TOWERA KUTAMBIRA MAFALA A MULUNGU

Mbumba ya Ahebere yapita nthando mbaikhala pyaka makumanai. N'thando mukhali nkhaba madzi nee pyakudya. Anthu a toma kudungunyira Mose na Aaroni, mbale wache, mbati: thangwi yanji takhonda kuphiwa na manja a Mbuya mu Egito pikhakhala ife na pikalango pya nyama mbatidya mikate na kutsandzaya mwatibweresa ku thando ino towera muphe na njala mbumba yonsene.

2. MBATIBVESERENI MAFALA A MULUNGU

Eksodo 16, 11-15; 17, 3-6

Thangui ya mipingo na pya kunensa pidzinji mu nthando, ninga pya kumwa, mbumba ya toma dhungunyira Mose mbati: tinamwanji? Mbatinadyanji? Mbuya apanga Mose: "Ndabva madungunyiriro a ana a Israele". Unadzaapanga: mawulo ano, pa kudoka dzuwa, munadzadya nyama; mangwana mundzakhuta na nkate. Na tenepa munadzakhala mbamudziwa kuti Ine ndine Mbuya, Mulungu wanu": Na mawulo kakamwe, abulukira makwerekweche dala mbagwa pa misasa; mangwana mwachembo chaoneka chigudu-gudu cha bume, n'khundu n'khundu mwa misasa. Bume iyeneyi pidagumika iyo, chabulukira pa thando chinthu chibodzi ching'ono, chakulandana na matalala akugwa pantsi". Na kuaona ana a Israele, abvundzana okha okha: "Mphyanji ipi?", Thangwi yache akhapidziwa tayu kuti ninji! Mose aapanga: "Ndi nkate unakupasani Mbuya towera mudye. Mbwenye mbumba ikhali penepo, na kuphatibswa na nyota thangwi ya kusoweka madzi akumwa, yadungunya kuna Mose mbilonga kuti: "Watikakamiziranji kuti tibuluke ku Egito? Ndi towera kuti tife na nyota, pabodzi na ana athu na mikumbi yathu na pifuyo pyene?" Mphapo, Mose aphembera kuna Mbuya: "Ndinachita tani kuna mbumba iyi? Thangwi iwo asafuna kundiponyera myala". Mbuya atawira kuli Mose: "Pita patsogolo pa mbumba, ukwate akulu a mpingo pang'ono a ku Israele, ukwate m'manja mwako mpswimbo yako, idagwanda na iwe nyandza, mbufamba. Ine ndinadzakudikhira pa phiri ya Horebu. Penepo unadzamenya mwala, mbapadzabuluka madzi adidi akumwa: mbumba mbidzamwa". Mose achita tenepo pa maso pa akulu a mpingo a ku Israele.

3. MBATIBVESERENI MAFALA AWA

Thando ndi mbuto yakugumana na Mulungu. Mbumba yadziwa mwadidi Mulungu wawo, mbapfundza kunkhulupira. Ndizidzi wenewu udamala mbumba n'thando, usachemerwambo ndizidzi wa umankhadzi usalesebza ninga ndizidzi unakhala amakhadzi pabodzi pene towera kudziwana, mbadzindikirana mbadzati kumanga banja. Ninga pyaka makumanai pidamala mbumba n'thando, Yezu amala ntsiku makumanai n'thando towera kugumana na baba pa kusasanyira basa yache. Ninga mudachitira Yezu, ife akristu anatowera Kristu, tisatongwa kukhala sawasawa pa ndizidzi wa ntsiku makumanai. Khundu inango, thando ndi ndizidzi unaona ife kuti ndi ninji pinakwanisa ife kuchita, ndi ndizidzi wakuthabuka. Ndi pa kuthabuka panadziwa ife ndizidzi wakufunana pyamaso, kufuna kwa Mulungu kuli mbumba, na kufuna kwa mbumba kuli Mulungu. Mbumba yabva njala, Mulungu aiguisira mana na makwerekweche. N'thando nkhaba madzi mbwenye Mulungu aabulusira madzi. Pidachita Mulungu towera kuphedza ahebreu pisatikumbusira pidachita Yezu m'phangwa Zadidi, mudatipasa iye chakudya cha manungo ache na chakumwa cha chiropa chache ninga chakudya chamaso cha moyo wakukhaliratu (Jo 6, 47- 51). Yezu atipasa madzi a moyo, Nzimu Wakuchena, anamwa madzi anewa hanadzakhalabve na nyota tayu mbwenye anadzakhala kuenda na kuenda (Jo 4, 1-14).

4. MBATIYIKHENI MU NSOLO MWATHU MAFALA AWA

Mulungu alonga : "Maulo ano munadzadya nyama, mangwana na machibese munakhuta na mikate, penepo munadzandidziwa kuti ndine Mbuya"

5. MBATITOWEDZENI MAFALA AWA

Ifembo pa ntsiku makumanai tisakhala sawasawa ninga Yezu? Ndi ndizidzi wakumpangiza kutawira kwathu, kufuna kwathu kusaka chakudya na chakumwa camaso. Ndi ndz dzimbo wakupangiza kufuna kwathu andzathu.

6. TIPHEMBE


Takhuta Mbuya, thangwi imwe ndimwedi chakudya. Mutipase chakudya chanu, cha Mafala anu.

Pa nyatwa, mutiwangise. Mukulise chitawiro chathu mwa imwe. Nee chinthu chibodzi chakutigwisa thangwi Mbuya wathu ndimwe basi.

MAKUMBUKIRO A MAPFUNDZISIRO

1. Mbani akhala n'thando pa pyaka makumanai? R/ Ndi mbumba ya Ahebere.
2. Mulungu apasa chakudya chanji a Ahebere mu thando? R/ Mana.
3. Mose achitanji towera akhale na madzi a kumwa? R/ Amenya mwala, madzi mbaoneka.
4. Mu thando khabepo pinthu. Mwenemo tinagumana na Mulungu, thangwi yanji? R/ Thangwi ndi mbuto yakupfulika nee mpingizo.
5. Yezu asatipasanji towera tidye? R/ Manungo ache ndi chakudya cha maso, na ciropa chache ndi chakumwa cha maso.

A ISRAELE PA DUZI NA PHIRI YA SINAI AMANGA MISASA YAWO



**«Mphapo mungabvera Mafala anga mbamukoya
chibverano changa, pakati pa mbumba zonsene
munadzakhala mbumba yanga yakusankhulwa na
chinthu changa ine ndinakhala Mulungu wanu»**

9. A aliança no monte Sinai

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALAA MULUNGU

Mbumba mu thando yapfundza kudziwa Mulungu. Iyo yaleser Mulungu, mbachita nayo chibverano. Madziko onsene a pantsi mba Mulungu. Mphapo Mulungu asankhula mbumba in'gono ya Israele ire ikhakhala mu ubitchu mu Egito. Mulungu akhafuna mbumba ya Israele towera achite nayo pinthu pizinji kuli anthu onsene. Ndi thangwi yache Mulungu achemera a Israele towera asankhula na ufulu wawo Mulungu wa maso.

2. MBATIBVESERENI MAFALA A MULUNGU

Eksodo 19, 2c-6; 24,3-8

Pakumala kubuluka Refidim, apita mu n'thando, amanga misasa yawo duzi na phiri. Mose akwira phiri, mbaenda kuna Mulungu. Pa tsonga ya phiri Mulungu alonga kuli iye, mbati: "Ndoko ukapange Aisraele, adzukulu a Yakobe, tenepa: Mwaona pidacita ine na aEgito; mwaonambo kuti ndakukwatani, ninga munakwatira nkhwazi anace padzulu pa maphaphido ache, mbandikudzesani kuno, kuna ine. Mphapo mungabvera mafala anga, mbamukoya chibverano changa, pakati pa mbumba zonsene, munadzakhala mbumba yanga yakusankhulwa na chinthu changa, thangwi pantsi ponsene mphanga. Munadzakhalambo umambo wa anyantsembe na mbumba yakuchena. Ndipyo pinatongwa iwe kupanga aizraeli". Mose aenda kalonga kuli mbumba mafala onsene a Mbuya na matongero ache onsene. Anthu onsene atawira pabodzi pene, mbati: "Ife tinachita pyonsene pidalonga Mbuya". Adzamale Mose alemba m'bukhu mafala onsene a Mbuya. Mangwana mwace na machibese, amanga guwa ya ntsembe pa tsinde ya phiri, mbaimisa myala khumi na miwiri, towera kukumbuka madzindza khumi na mawiri a Israele. Penepo apanga mapswaka anango a Israele, kuti apereke kuli Mbuya ntsembe zakupya, mbaphambo anamphulu anango, towera akhale ntsembe zakupereka takhuta. Mose akwata chiropa pang'ono, mbachitsanula m'phande, chinango mbaciwaza pa guwa ya ntsembe. Adzamale akwata Bukhu ya chibverano, mbaiwerenga kuna mbumba. Apo mbumba yati: "Tinabvera Mbuya mbatichita pyonsene pinatipanga iye". Penepo Mose akwata chiropa chikhali m'phande, mbachiwadzira mbumba, mbati: "Ichi ndi chiropa cha chibverano, chidacita Mbuya na imwe".

3. MBATIBVESERENI MAFALA AWA

Mulungu aendesa mbumba ya Israele ku phiri ya chibverano mwa pang'ono-pang'ono, makamaka phiri ya

Sinai. Towera kutoma chibverano, pisafunika kudziwana. Na tenepa Mulungu adzipangizika kuli mbumba ya Israele, aidziwisa dzina yache na machitiro ache na manyerezero ace. Pontho Mulungu apasa a israele matongero khumi, anafunika towera kucita chibverano. Aisraele atawira pidaphemba Mulungu mbidzakhala mbumba ya Mulungu kuenda na kuenda. Thangwi ya penepyo Mulungu asaigugumira Israele mbakhonda kuisiya. Chibverano chenecho Mulungu na mbumba chachitwa na Mose na ntsembe ya ng'ombe, chiropa chache mbiciwadzirwa kuli guwa ya Mbuya na kuli mbumba. Patsogolo pache na kufewa kwa mbumba, yaleka Mulungu mbilambira alungu anango, maseze na kufewa kweneko Israele na kutowedza chibverano chache. Ntsiku ibodzi Mulungu atuma mwanache ene towera kuchita chibverano chipswa. Chibverano chenechi chipswa chachitwa pa phiri ya Kalavario (chipala), chachitwa na chiropa cha Yezu pa kufa pa ntanda. Chibverano chipswa chidachitwa na Kristu chadzesa mwambo upswa, mwambo wakufuna na, mbulembwa na Nzimu Wakucena m'mitima mwa anthu. Thangwi ya penepyo pa phwando yakumalisa Yezu alonga: Kwatani mbamumwa, ichi ndi chiropa ca chibverano chipswa. Chiropa chenechi chinachololerwa imwe thangwi yakulekera madawo.

4. MBATIYIKHENI MU NSOLO MWATHU MAFALA AWA

"Mbuya alonga kuli mbumba mbati: mphapo mungabvera Mafala anga, mbamukoyo chibverano changa pakati pa mbumba zonsene munadzakhala mbumba yanga yakusankhuliwa na chinthu changa ine ndinadzakhala Mulungu wanu."

5. MBATITOWEDZENI MAFALA AWA

Tinapangiza tani kuti ndife axamwali a Mulungu? Tinyerezere iye mbatichita pinatipfundisa mafala ache. Mbatikhala nanthu pa ntsembe ya chibverano cipswa, misa.

6. TIPHEMBE

Mbuya Mulungu wathu, Ndimwe wankulu na wadidi. Imwe musatifuna na kukhala xamwali wathu. Tinakusimbani mbatikuchitani takhuta. Imwe musatiwona kazinji kene kufamba kutali na imwe. Tirekereni. Na mphambvu ya Nzimu wa Yezu, mutiphedze kukhala pabodzi na imwe mbatifamba mu njira yanu na kubvekesa kufuna kwanu! Amen.

MAKUMBUKIRO A MAPFUNDZISIRO

1. Ndi mbumba ipi idasankhulwa na Mulungu? **R/ Mbumba ya Ahebere**
2. Mulungu asafuna kuti mbumba ifambe tani na iye? **R/ Na ufulu.**
3. Mbumba ya Ahebere yapfundza kupi kudziwa Mulungu? **R/ N'thando.**
4. Mulungu achitanji na mbumba inei ikulu? **R/ Chibverano.**
5. Mbumba ya Ahebere yabvera midzidzi yonsene matongero khumi (10)? **R/ Nkhabe, mbumba yalambira alungu anango.**



Os 10 mandamentos

**«Os 10 Mandamentos são
o caminho de Deus, um caminho de amor,
de Liberdade e de Vida»**

10. A aliança e os 10 mandamentos

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALAA MULUNGU

Mulungu mbadzati kuchita chibverano na mbumba yache atoma kuibvundza kuti anatawira kufamba pabodzi na kutoweza matongerero ache. Mulungu nkhaba kufuna kuti mbumba ya ubitchu ifune Mafala ache na kukakamizwa peno na kupoga. Mulungu asafuna kuti amuna na akazi atawire na ufulu wawo kukhala na iye mbatoweza njira zache. Matongerero khumi (10) diwo njira ya Mulungu, njira ya kufuna ya ufulu na ya moyo. Mulungu apereka matongerero anewa na mulomo wa Mose.

2. MBATIBVESERENI MAFALA A MULUNGU Eksodo 20, 1-3.7-8.12-17

Penepo Mulungu alonga mafala awa, mbati: "Ine ndine Mbuya, Mulungu wako, adakubulusa ku Egito, mu udzakaze. Leka kulambira alungu anango, alungu a pezi. . Leka kulonga dzina yanga pa pezi, thangwi ine, Mbuya Mulungu wako, ndinaonesa nyatwa ale onsene anailonga pa pezi. Ukumbuke ntsiku ya sabudu, thangwi ndi ntsiku ya Mbuya. Lemedza babako na mako, towera ntsiku za moyo wako ziinjipe mu dziko inadzakupasa ine, Mbuya, Mulungu wako. Leka kupha munthu, Leka kucita upombo. Leka kuba. Leka kupambizira ndzako. Leka kusirira nyumba ya ndzako, leka kusirira nkazi wa ndzako, nee ndzakaze wache, nee nyagrinya wache, nee ng'ombe yache, nee buro yache, nee pinthu pyache pinango".

3. MBATIBVESERENI MAFALA AWA

Mafala adabva ife asapangiza kuti ndi ninji pinafunika maka kuli Mulungu, makamaka: Iye ndi Mulungu mbodzi ekha basi, mphapo ha-

tisatongwa tayu kukwata anthu, peno pinthu peno iwenene ninga Mulungu. Munthu asakhala ndzakaze angalambira pinthu pinango. Mulungu ndiye ekha basi anakwanisa kuombola munthu. Na tenepo tisatongwa kulemedza Mulungu mbatinfuna. Pontho pisafunika kumphembera ntsiku zonsene makamaka ntsiku ya dimingu. Towera kupangiza kuti tisafuna Mulungu, tisatongwa kulemedza anthu mbatiafuna, abale athu, ana a Mulungu. Thangwi yakucitwa na chinthunzithunzi mbalandana na Mulungu, pyakuipa pyonsene pinachitira ife mbodzi mwa abale athu ndi mangawa kuli Mulungu. Awa ndiwo mafala anachepesa matongerero khumi. "Funa Mbuya Mulungu wako na ntima wako onsene na nzimu wako onsene, mbufunambo ndzako ninga na iwenene (Mt 22,17-40).

4. MBATIYIKHENI MU NSOLO MWATHU MAFALA AWA

Kupfundza matongerero khumi (10)

5. MBATITOWEDZENI MAFALA AWA

Pa ntsiku ya Dimingu na nsoka, tisapasa ndizidzi kuli Mulungu, pa kubva mafala ache. Pa sumana, pyonsene pinacita ife, tinapichita na kufunana na kulemedza Mulungu, mbatitowedza matongerero ache.

6. TIPHEMBE

Mbuya, ndipangizeni njira yanu towera ndi towere mpaka ku nkomo. Muchite kuti ndiabvese matongerero anu mbandiatowera. Ndinakoya mu ntima mwanga. Mafala anu asandisangalasa, matongerero anu asandipasa ntendere. Mbuya Ndimwe wadidi, musachita pyadidi musandipfundzisa kufuna kwanu. Amen!

MAKUMBUKIRO A MAPFUNDZISIRO

1. Ndi ninji pinafunika towera kuchita chibverano na Mulungu? **R/ Pisafunika ndi kufamba na Mulungu.**

2. Ndi njira ipi inafuna Mulungu mbaiphemba mbumba yache? **R/ Kutoweza matongerero ache.**


3. Longa matongerero khumi (10)

I. Funa Mulungu na ntima wako onsene **II.** Leka kulonga dzina yache pa pezi **III.** Lemedza ntsiku ya Dimingu na ntsiku za maphwando makulu. **IV.** Lemedza babako na mako **V.** Leka kupha munthu **VI.** Leka kuchita pya lukwali **VII.** Leka kuba **VIII.** Leka kupambizira andzako **IX.** Leka kunyerezera na kusirira pya lukwali **X.** Leka kusirira cha ndzako

4. Yezu atipasa matongerero api kuchepesa matongerero khumi (10)? **R/ Funa Mulungu na ntima wako onsene mbufunambo andzako ninga iwe ene.**

5. Mbani anapulumusa mwa ndimomwenedi munthu? **R/ Mulungu.**

ELI ALI KUBVESERA SAMUELE



**«Mbuya achemera: "Samuele! Samuele!"
Iye atawira: "Longa Mbuya,
ntumiki wanu ali kubva"»**

11. MULUNGU ACHEMERA SAMUELE

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALAA MULUNGU

Ahebere abuluka mu Egito mbatsogolerwa na Mose. Na kufa kwa Mose, Yoswa akwata mbumba mbayenda nayo ku dziko ya kupikirwa ya kanani. Mbumba ya Israele ndi madzinda khumi na mawiri idagawika maphindi matatu mbaikhala inango mu Galileya, Samaria na mu Judeia. Masezi akhale pache pache mbwenye iwo akhathimiza kukhulupirira Mulungu mbodzi wa Abramu, Izaki na wa Yakobe. Towera athimize kukoya chibverano chidachita iwo, Mulungu apasa mbumba atsogoleri asachemerwa atongi. Na atongi a Israele akoya chibverano mbaikhala mu ubodzi. Ninga musalongerwa ipyo, Samuele ndi ntongi wakumalisa adaikha Mulungu patsogolo pa mbumba. Mbachiri m'phale, Samuele apereka moyo wache kuli Mbuya. Iye achita basa ya Mulungu ya kupulumusa a Israele m'manja mwa Afilisti.

2. MBATIBVESERENI MAFALA A MULUNGU 1 Samuele 3,4-15.21

Mbuya achemera Samuele, iye mbatawira: "Ndiri pano", athamanga kuna Eli mbati: "Mwandichemera, ndiri pano". Eli ati: "Sidakucemera tayu, ndoko ukagone". Na tenepa Samuele aenda kagona. Mbwenye Mbuya achemera pontho Samuele, iye alamuka, aenda kuna Eli mbati: "Mwandichemera, ndiri pano". "Mwananga, sidakuchemera tayu, ndoko ukagone". Samuele akhadziwa tayu kuti ndi Mbuya, thangwi Mbuya akhadadzati kulonga na iye. Kachitatu Mbuya achemera Samuele; mwana alamuka aenda kuna Eli mbati: "Mwandichemera, ndiri pano". Penepo Eli apibvesa kuti ndi Mbuya akhachemera mwana, na ipyo ati kuli iye: "Ndoko ukagone, ungachemerwa pontho, utawire: longani Mbuya ntumiki wanu ali kubva". Samuele aenda kagona pontho pa mbuto pace. Penepo Mbuya adzaimira duzi na iye, anchemera ninga mukhadachitira iye mbati: "Samuele! Samuele!" Samuele ati: "Longani, Mbuya, ntumiki wanu ali kubva". Mbuya alonga kuna Samuele mbati: "Ndisafuna kuchita chinthu mu dziko ya Israele mbwenye onsene anafuna kuchibva, ico chinadzatawirira m'makutu mwawo. Ntsiku yeneyi ndinadzacita kuli Eli pyakugopswa pyonsene pidalonga ine kuli mbumba yace. Ndinadzapitoma mbandipifikisa ku nkomo. Ndandziwisa kuti ndinadzakonesa dzindza yache kuenda na kuenda thangwi ya uwipi wawo,

na thangwi iye akhadziwa kuti anache akhadzedzema mbwenye adaasandika tayu. Thangwi ya pyenepi ndinadumbira kuna dzindza ya Eli kuti kudawa kwawo chipo na chipo kunadzalekerwa, nee na kupereka ntsembe nee na miyoni". Samuele agona mpaka kucha kunja mbafungula misuwo ya nyumba ya Mbuya, mbwenye akhagopa kupanga Eli pya ndoto zache. Mbuya akhathimiza basi kuonekera mu Silo. Ndi kweneko kukhaonekera Mbuya kuli Samuele mbampanga mafala ache.

3. MBATIBVESERENI MAFALA AWA

Mwanamphale Samuele akhakhala mu templu ya Mbuya thangwi yakuperekwa na mache Yana. Pikhakhala iye mwenemo, Mulungu ancemera na dzina yache katatu, Samuele mbatawira" Ndiri pano. Longani Mbuya ntumiki wanu ali kubva". Mulungu nkhaba kuchemera munthu nee thangwi. Achemera Samuele mbapasa basa yakuo-nera mbumba yache, kubva mafala a Mbuya mbaabvekesa kuli mbumba. Ndiko kubveka kuti Samuele akhatongwa kusogolera mbumba ya Mulungu mbaitowedzesa mwambo wa chibverano mwakukhulupirika. Samuele aphata basa yache na kufuna kwache. Iye tisafunika kumulandira pidachita iye. Ninga Samuele, Yezu achemerwa kugumanyisa mbumba ya Mulungu. Yezu hadagumanyisa mbumba ya Israele basi tayu, agumanyisambo mbumba zonsene za pantsi na chibverano chipswa.

4. MBATIYIKHENI MU NSOLO MWATHU MAFALAAWA

Mbuya anchemera: " Samuele Samuele..." Iye atawira: " Longa Mbuya ntumiki wanu ali kubva".

5. MBATITOWEDZENI MAFALA AWA

Mulungu asaphata basa kazinji kene. Iye asaphatira ntendere, kusandzaya na makhaliro a mbumba yache. Mpaka na lero Mulungu asatichemera towera tiphate naye basa. Tipurtaneni mafala ache anatipanga iye ntsiku zonsene towera tikwanise kutawira ninga Samuele, Ndiri pano, Mbuya.

6. TIPHEMBE

Mulungu Mbuya, Mwachemera Samuele towera aphate basa yanu, ifembo tinafuna kuphata basa yanu na kuphatirambo abale athu ninga iye. Mbuya, mutiphedze kutawira pinatiphemba Imwe. Tiri dzololo kuphata basa na imwe, tipfundziseni kubva na kutawira mungatichemera. Amen!

MAKUMBUKIRO A MAPFUNDZISIRO

1. Longa Mulungu achemera tani Samuele...
2. Thangwi yanji Samuele akhakhala na Eli mu nyumba ya Mbuya? **R/ Mai wache ampereka kuli Mbuya.**
3. Pa dzidzi wa Samuele atsogoleri akhathulwa tani? **R/ Atongi.**
4. Mulungu ampanganji Samuele towera apange Nyantsembe Eli? **R/ Ine sidakomerwa tayu na anthu a banja yako. Ana ako adawa. Iwe waleka pyako. Ndinadzaonesa nyatwa anthu a banja yako**

MULONGERI NATANE NA MAMBO DAVIDE



**«Mulungo ati kuli Davide:
“Nyumba yako na umambo wako unadza-
khala kuenda na kuenda, pa maso panga,
mpando wako unadzakhala
wa kuenda na kuenda»**

12. DAVIDE, MAMBO WANKULU, KHOLO WA MESIYA

Makumbukiro a mapfundziro a nduli

1. MBATISASANYIKENI TOWERAKU-TAMBIRA MAFALA A MULUNGU

Mulungu atuma mulongeri Samuele ku nyumba ya Yese, mu chisa cha Betlehe-mu towera asankhule Davide. Davide, makabuswa, adzakhala mambo pa kud-zozwa iye na mulongeri Samuele. Ntsiku ibodzi, Mulungu atuma mulongeri Natane kapanga Davide thangwi iye akhafuna ku-manga nyumba ya Mulungu.

2. MBATIBVESERENI MAFALA A MULUNGU

2 Samuele 7, 8-17

Mphapo, panga ntumiki wanga Davide kuti Mbuya alonga: Ine ndakubulusa pa kukum-biza mabira ako, towera kukukhalisa mambo wa mbumba yanga ya Izraeli. Ndikhali na iwe ntsiku zonsene mukhafamba iwe; ndafudza pa maso pako anyamalwa ako onsene, nda-cita kuti dzina yako ikhale ya mbiri pakati pa akulu. Ndasasanyira mbumba yanga mbuto yadidi mudaiyikha ine, mbikhala pe-nepo mbikhonda kusosiwa na munthu; na anyamalwa ache chipo anadzaiponderera ninga mwa kale, pa ndzidzi wa atongi. Ndi-nakupfulikisa mbandikupulumusa m'manja mwa anyamalwa ako onsene. Na tenepa, Mbuya anakudziwisa lero kuti ndiye ene anadzakumangira nyumba. Zingafika ntsiku zako zakuenda kapuma pabodzi na aba-bako, nduli mwako ndinadzakuza mwanako mbodzi wa m'mimba mwako, mbandilikhi sa tenepo umambo wako. Iye anadzandiman-gira nyumba, Ine mbandiwangisa kuenda na kuenda mpando wache wa umambo. Ine ndinadzakhala baba kuli iye, iyembo anadzakhala mwana kuli Ine. Iye angaipisa, ndinadzankwapula na mpswimbo. Mbwenye chipo ndinadzabulusa nkhombo yanga kuna

iye, ninga mudaibulusira Ine kuna Sauli, adathamangisa Ine pa maso panga. Nyum-ba yako na umambo wako unadzakha- la kuenda na kuenda, na mpando wako una-dzakhalambo sawasawa".

3. MBATIBVESERENI MAFALA AWA

Davide abvesera pikhapangwa iye na Mu-lungu na mulomo wa mulongeri Natan. Iye Davide ninga mambo, akwanisa kugumanya mbumba yache idagawika na nkondo, mbaisogolera ninga nkumbizi wamaso. Davide apereka takhuta kuli Mulungu na nyimbo za masalmo mbafuna kumangira templu Mbuya. Mulungu apikira kuli Davide mbumba ikulu mudadzabalwa Mpfundisi. Pa ntsiku yachidziwiso, Anju wa Mbuya apanga Mariya. Mbuya anadzakupasani mpando wa Davide, babanu (Lk. 1,32). Yezu, mambo wankulu, nkumbizi wa Israele (Jo 10) abalwa mu Belemu. Chisa cha Davide.

4. MBATIYIKHENI MU NSOLO MWATHU MAFALA AWA

Mulungu ati kuli Davide: " Nyumba yako na mambo wako unadzakhala kuenda na kuenda, pa maso panga.

Mpando wako unadzakhala wa kuenda na kuenda".

5. MBATITOWEDZENI MAFALA AWA

Kodi Ife tiri dzololo towera kudziperekeka kuli abale athu?

Tisaphatana tani pa nsoka pathu? Kodi ti-satawira mwakukwanira towera kupereka takhuta kuli Mbuya ninga Davide?

Mbatilongeni pinacita ife (pinatowedza ife).

6. TIPHEMBE

Tiphembere pabodzi salmo 145, 1-21 (cf. Pág. 43)

MAKUMBUKIRO A MAPFUNDZISIRO

1. Mbadzati kusankhuliwa mambo Mbani akhali nkumbidzi? **R/ Davide.**
2. Mbani mulongeri wankulu adapanga Davide kuti anache anadzatonga a Israele? **R/ Natane.**
3. Davide Ali kufuna kumanga nyumba ya Mulungu. Mphapo Mulungu ampanganji na mulongeri Natane? **R/ Anadzabala dzukulu wankulu.**
4. Longa madzina mawiri a anthu adabalwa ku Betlehemu. **R/ Davide na Yezu.**
5. Mbani dzukulu wankulu wa Davide? **R/ Yezu.**

MOTO WAPISA NTSEMBE YA ELIYA



**«Anthu onsene agwa pantsi na pfupfu ya
mimba mbati: "Mbuya ndiye Mulungu"»**

13. MULONGERI ELIYA

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALA A MULUNGU

Madzindza khumi na mawiri (12) a Israele ali kufuna kuti akhale na mambo wawo wa kuenda na kuenda ninga munachitira madziko anango akuindikana na iwo. Iwo aphemba mulongeri Samuele na tenepa Mbuya na kupyona asankhula Sauli. Kubulukira mambo Sauli akhala amambo anango azinji akuipa: hakhabva tayu Mafala a Mulungu, atsogolera mbumba mwa kugawana-gawana, mwa kusowa ulinganiri, kulambira alungu a pezi na kusiyana kwawo chibverano na Mulungu chidachita iwo kuphiri ya Sinai. Pidachitika tenepa, Israele yatsogolerwa na mambo dzina yache ndi Akabu. Iye ankawata nkazi wakunja. Na thangwi ya nkazi wenei mambo na mbumba yonsene yasiya Mulungu mbalambira alungu a pezi. Ndi thangwi ya ipyo mudabwera mulongeri Eliya towera kumenyana na mambo mbachita kuti anthu abwerere pontho kuna Mulungu wamaso.

2. MBATIBVESERENI MAFALA A MULUNGU

1 Amambo 18, 20-26a.29b...36-39

Akab acemeresana ana onsene a Israele, mbadzesambo alongeri pa phiri ya Karmelo. Eliya afendezera anthu mbati: "Munadzaleka lini kuchikhamira makhundu mawiri ene? Ngakhale kuti Mbuya ndiye Mulungu kakamwe, muntowere; ngakhale kuti ndi Baale, khalani na Baale!" Anthu hadantawira tayu. Eliya athimiza mbati: "Ine mulongeri wa Mulungu, ndasala ndekhene basi, alongeri a Baale ndiwo madzana manai na makumaxanu. Tipaseni ng'ombe ziwiri: iwo anasankhula yawo mbaipadzangula, angamala aiyyike pa guwa, mbaleka kuigasira moto. Inembo ndinachitambo sawasawa na inango, nee kuigasirambo moto tayu. Imwe munadzaphemba mulungu wanu, inembo ndinadzaphemba Mbuya. Ule anatawira kutuma moto, ndiye anadzadzindikirwa ninga Mulungu wamaso kakamwe". Anthu onsene atawira: "Mphyadidi!". Eliya apanga alongeri a Baale mbati: "Tomani ndimwe, sankhulani ng'ombe yanu mbamui-padzangula thangwi imwe ndimwe akuinjipa maningi. Muphembe mulungu wanu, mbwenye lekani kuyikha moto tayu". Iwo akwata ng'ombe yawo idapaswa iwo mbaipadzangula phindi- phindi. Adzama atoma kuchemera dzina ya Baale kutomera na machibese mpaka na masikati na kukhuwa: "Baale, tibvesere!" Mbwenye Baale noo pyache, hadaatawira tayu. Iwo akhabvina pyawo n'khundu mwa guwa ikhadasasanya iwo. Pa kupendama dzuwa, akhathimiza basi na kuphekeka na kukhuwa mpaka ndzidzi wa kupereka

ntsembe. Pa kukwana ndzidzi wa ntsembe, mulongeri Eliya afendezera guwa mbaphemba Mulungu mbati: "Mbuya, Mulungu wa Abram, na wa Izaki na wa Israele, apangizeni lero kuti Imwe ndimwe Mulungu wa Israele, kutimbo ine ndine ntumiki wanu, ndachitapi, thangwi adandituma ndimwe. Ndivvesereni, Mbuya, towera anthu awa adzindikire kuti Imwe ndimwe Mbuya, anasanduzana mitima yawo". Penepo pene wabwereratu moto wa kudzulu, mbupisa pya ntsembe, nkhuhi na myala ene; mbuumisambo madzi a djenje ire. Na kuona pyenepi anthu onsene agwa pantsi na pfupfu ya mimba mbati: "Mbuya, ndiye Mulungu".

3. MBATIBVESERENI MAFALA AWA

Mulongeri Eliya adziwa kuti pidalambirisa mbumba kuli alungu a pezi ndi kufewa kwake na kugopa. Thangwi ya ipyo, iye aphemba Mulungu towera awangise kutawira kwa abale ache, na kwaapasa chipapo chakubwerera pontho kuli Mulungu wamaso. Eliya, pa maphembero ache afuna kudziwisa ipi: -Mbuya ndi Mulungu wa Israele, Mabaale ndi madzimunthu. -Eliya ndi Mulongeri, ntumiki wa Mbuya. -Moto wa Mbuya wachita ninga njazi towera kudzapisa pya ntsembe (mwanabira) yamumphu ene, penepyo ndi pidagodamisa mbumba mbilonga: "Mbuya, ndiye Mulungu". Mu Mphangwa Zadidi, Eliya asapangibzwa ninga mulongeri wankulu (Mt 17,10-13, Jo 1, 19-21). Ninga Juwau mbatizi, asasanyira pya kubwera kwa Mfundisi, ndi ninga Eliya adasekesa mbumba zonsene na Mulungu, babathu.

4. MBATIYIKHENI MU NSOLO MWATHU MAFALA AWA

Anthu onsene agwa pantsi na pfupfu ya mimba mbati: Mbuya ndiye Mulungu. 5. MBATITOWEDZENI MAFALA AWA Ntsiku zino tisagumana anthu m'mitsoka mwathu adasiya kuphembera mbakhonda kusonkhana na ntsoka. Asiya Mulungu wa Yezu Kristu towera kulambira madzimunthu ninga: kobiri, utongi, pyadidi, pyakumwa, pya ufiti.... Ine ndiri kuchitanji towera ndikhale wakukhulupirika mbanditawira Yezu Kristu? Ndinakwanisa kucitanji towera ndiombokwe kuli alungu a pezi a lero?


6. TIPHEMBE

Mbuya, lekani kutinkhonda thangwi ya uipi wathu, mbwenye mutiang'ane na maso anu adidi. Mbuya bwerani kudzatibulusa mwa alungu a pezi. Tinakuphemba ife, Mbuya.

MAKUMBUKIRO A MAPFUNDZISIRO

1. Mbani mambo wa kutoma wa Israele? **R/ Sauli.**
2. Longa mambo mbodzi na nkazache adasiya njira ya maso ya Mulungu. **R/ Ndi Akabi na nkazache Yezabele.**
3. Mbani mulongeri ankafuna kuti mbumba ibwere pontho kuli Mbuya? **R/ Ndi Eliya.**
4. Fokotodza, mulongeri Eliya achitanji towera kupangiza kuti asankhula Mulungu wamaso.
5. Mbani mulongeri unango wa nkulu anafuna kuphedza mbumba towera ibwerere kwa Mulungu wamaso? **R/ Ndi Yezu.**

MULONGERI ALI KUPANGA MBUMBA



**«Thangwi anthu a mbumba yanga andisiya
ndekha, mbasaka alungu anango a pezi akunkhonda
kuwapasa moyo ninga munthu anakumba n'chera wa
kukhala na minyanja mbukhonda kukoya madzi»**

14. MBUMBA YAKUKHONDA KUKOYA CHIBVERANO

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALA A MULUNGU

Pa mapfundzisiro anango a ketekeze, tabva pya Davide. Pa kumala Davide tabva pya Salomoni mwana wache, adzakhalamambo wa Israele. Pa kufa kwa Salomoni, kwaoneka kagawika kwa mbumba ya Israele mbikhala mapindi mawiri thangwi ya kukhonda kubverana. Phindi ibodzi iyakhala na mambo wawo ku kwiriro inango na mambo wawo ku nterero. Pa kupita pyaka madzana mawiri (200) pidamala iwo kagawika, dziko ya kunkwiri yakwatiwa na anyankhondo a kunja. Iyo yafudziwalitu. Kunkwiri na ku nterero, kwaoneka alongeli anthu akuphembera adachemerwa na Mulungu towera alonge mu dzina yache Mulungu. Basa ya alongeri ikhali yakupanga mbumba pire pya kuipa na kuapangambo kuti achite pyadidi mbayikhala akhukhulupirika mu chibverano. Ninga mudachitikira ipyo Amosi atumiwa na Mulungu towera aphate basa ku dziko ya ku nkwi, Yeremia ku dziko ya kunterero. Alongeri awiri awa apanga anthu kuti achinje mitima yawo mbaikhala akhukhulupirika pa chibverano chawo. Mbwenye iwo ankodiwa: ninga Amosi athamangisiwa ku dziko ya ku nkwi, mphapo Yeremia aponyiwa mu nchera.

2. MBATIBVESERENI MAFALA A MULUNGU Amosi 8,4-8

Bvani, imwe anyakubvuya! Pinasaka imwe nkufudza anyakucherenga a ku dziko basi. Muli kulongeka mbamuti: "Tinafuna pikulu kuti phwando ya mwezi wakucagala imale chinchino, towera tikwanise kugulisa pontho mapira; ntsiku mbo ya sabudu tinafuna kuti imale chinchino towera tikwanise kufungula pontho nyumba zathu za malonda. Penepo tinachepesa mpimo wa mapira mbatithimizira ntengo wawo wakupundza anthu, na kwaaphwairisa pa kupima na kugulisa mbo na mapira ene akubvunda na kobiri zizinji. Tinachita mbo anyakucherenga adzakaze athu, maseze akhali na ife na mangawa a masandalya mawiri basi". Mbwenye Mbuya Mulungu wa Israele adumbira mbati: "Chipo na chipo sinadzadzala mabasa awo akuipa tayu". Kodi si thangwi ya kudumbira kweneko tayu kunatekenyesa pantsi ponsene na anthu mbo mbakhala na mantha makulu? Kodi mbo si thangwi ya kudumbira kweneko tayu, kunakhalisa dziko yamumphu via-via ninga madzi a mu nyanza ya Nilo, anadzala mbapwa ninga nyanza ya ku Egito?.

Yeremia 2, 7-13

Ndine adaafikisa mbo ku dziko yadidi towera akomerwe na pyakubvuna pyawo na pinango mbo pyadidi. Maseze na ipyo, iwo acerengesa dziko yanga mbaipwazisa. Penepo pene anyantsembe ene akhabvundza: "Mbuya

ali kupi?" Iwo mbakhonda na kundidziwa kwene. Atongi mbo a dziko andisandukira, na alongeri ene akhalonga mu dzina ya Baale basi na kulambira mbo madzimunthu a pezi. Thangwi ya pyonsene pi, Ine Mbuya ndinadzakonesa imwe na ananu. Ndokoni ku mabulukiro a dzuwa mpaka ku Kitimi, mbamutuma mbo anthu ku madokero mpaka ku Kedare. Kweneko kunadzaoneka pinthu, chipo pidzati kucitika. Madziko anewa na madziko anango chipo asachinja alungu awo maseze mbapezi, mbwenye anthu a mbumba yanga andisandukira, Ine Mulungu adaapasa mbiri, mbatoweza alungu a pezi. Thangwi ya ipyo, kudzulu kwene kunadzadzuma napyo na kugopa pikulu. Ande, anthu a mbumba yanga adawa kawiri. "Andisiya ndekha, Ine adaapasa moyo, mbasaka alungu anango a pezi akukhonda kwaapasa moyo, ninga munthu anakumba nchera wakukhala na minyanza.

3. MBATIBVESERENI MAFALA AWA

Amosi na Yeremia hadagopa tayu kulonga pyamaso. Pyamaso pyenepi mphyipi? Mbumba yasiya Mulungu wamaso, yaduwala chibverano mbasaka alungu anango. Amosi alonga kuti: mafumu afuma maningi mbakhala akudyekerwa; asadyera manja anyakucherenga mba-dyekerwa atongi. Ninga mudalongera mulongeri Amosi kuti: Mulungu hasabvera maphembero a ale anachita pyakuipa tayu, mbakhonda kufuna abale awo. Ku nkwi na ku nterero kwene, alongeri hadakwanisa tayu kuphinduza makhaliro a anthu mbakhondambo kukwanisa kubwedza chikhulupiriro cha chibverano. Na thangwi ya penepyo madziko mawiri ene a ku nkwi na a ku nterero amala kufubzwa anthu anango mbatamibswa ku dziko ya Babiloniya.

4. MBATIYIKHENI MU NSOLO MWATHU MAFALA AWA

Mulungu alonga na mulomo wa Yeremia: "Thangwi anthu a mbumba yanga andisiya ndekha, mbasaka alungu anango a pezi akukhonda kuwapasa moyo ninga munthu akumba n'chera wa kukhala na minyanja mbunkhonda kukoya madzi".

5. MBATITOWEDZENI MAFALA AWA


Kukhala wamaso kuli Mulungu nkutowedza pya ulinganiri. Nkhuthauka pya uthambi na pyakudyekerwa. Khukhala na ulinganiri, nkufuna anthu, abale athu, makamaka anyakucherenga na adasiyiwa okha. Ife tiri kuchitanji?

6. TIPHEMBE

Mbuya, Imwe musatichemera, Imwe musatifuna towera kapanga abale athu amuna na akazi. Sanduzani mitima yathu, tiwangiseni towera tikhale axamwali anu kuenda na kuenda. Amen!

MAKUMBUKIRO A MAPFUNDZISIRO

1. Mbani Mambo wakumalisa wa Israele pikhali iwo mbumba ibodzi (mbaidzati kugawika ku nkwi na ku nterero)? **R/ Salomoni.**
2. Mulungu atuma ani towera kupanga mbumba kuti asiye pyakuipa mbakhala akukhulupirika kuenda na kuenda pa chibverano chawo na Mbuya? **R/ Alongeri.**
3. Longa mbani mulongeri adatumiwa ku nkwi na adatumiwa ku nterero. **R/ Amosi na Yeremia.**
4. Pisabvekanji: "Thangwi anthu a mbumba yanga andisiya ndekha, mbasaka alungu anango a pezi akukhonda kuwapasa moyo ninga munthu anakumban'chera wa kukhala na minyanja mbunkhonda kukoya madzi"?
5. Alongeri awa awiri akwanisa kuchita basa yawo yakusanduza mitima ya anthu? Pyachitika ndi ninji? **R/ Nkhabe, hadakwanisa tayu kuchita basa yawo: iwo aphiwa mbafudziwa.**



MOSE: MATON- GERO PA MWALA

NA YEZU: MATON- GERO MU NTIMA



**«Ndinakupasani ntima upswa na kuikha
Nzimu wanga upswa nkati mwa imwe»**

15. MPHANGWA YA CHIBVERANO CHIPSWA

Makumbukiro a mapfundziro a nduli

1. MBATISASANYIKENI TOWERAKUTAMBI-RA MAFALA A MULUNGU

Mbumba ya madziko mawiri (2) hidabvesera tayu Mafala a alongeri. Na tenepa akulu awo aphiwa anango mwa iwo atamipswa ku madziko anango nyumba yawo ya Mulungu yamala fudziwa anthumbo anango azinji atamipswa: ndi kutamipswa. Pikhadakhala iwo akutamipswa na tenepa anyerezera ponto dziko yawo, nyumba yawo ya Mulungu na chibverano chidachita iwo na Mulungu mu thando. Ndi thangwi ya ipyo Mulungu abvera ntsisi mbafuna kuaombola.

2. MBATIBVESERENI MAFALA A MULUNGU Yeremia 31,31 ss

Mbuya ati: "Ziri kufika ntsiku zinadzachita Ine chibverano chipswa na mbumba ya Israele na mbumba 'mbo ya Yuda.

Ezekiele 36,24ss

Ndinakukwatani pakati pa mbumba zonsene na pa madzi ko onsene, mbandikubwedzani ku dziko kwanu. Ndinakuwazirani na madzi akuchena, mbandikuchenesani mwa alungu anu a pezi onsene na pinango pyonsene pidakuphingizani. Ndinakupasani ntima upswa na nzeru zipswa. Ndinabulusa ntima wanu wakhakhama, na wa mwala, mbandikupasani ntima wakubvera. Ndinaikha nzimu wanga n'kati mwa imwe, mbandichita kuti: mukoye mwambo wanga mbamubvera matongero onsene adakupasani Ine. Penepo munakhala pontho ku dziko idapasa Ine makholo anu. Munakhala mbumba yanga, Ine 'mbo ndinakhala Mulungu wanu. Ndinakupulumusani m'pyonsene pidakuphingizani. Ndinapanga mapira kuti: ainjipe pikulu pyene, towera mukhonde khala pontho na njala. Ndinadzainjipisa misapo ya miti yanu na ya minda yanu, towera mukhonde singirirwa pontho na mbumba zinango thangwi ya kukhala na njala. Munakumbuka makhaliro anu akuipa na pyakuipa pinango pidachita imwe, munanyanyasirwa na imwe mwekhene na kunyerezera pontho manya anu

na madawo anu. Imwe, aizraeli, dziwani pyadidi pyene kuti: sinachita pyonsene 'pi tayu thangwi ya imwe. Ndinafuna kuti: mukhale na manyadzo makulu ene thangwi ya pyonsene pinachita imwe. Ndipyo pidalonga Ine, Mbuya wankulu kakamwe".

3. MBATIBVESERENI MAFALA AWA

Matsamba awa asapangiza mwadidi mwene kuti anthu mbakufewa, thangwi nkhaba kukwani-sa kutowedza matongero; asalambira alungu anango mbaduwala chibverano chidachita iwo na Mbuya. Maseze na mwenemo, Mulungu afuna kucita chibverano chipswa chakusiyana na cha pa phiri ya Sinai. Pa Sinai, mwambo walembwa pa miyala, miyambo ya chibverano chipswa, yalem-bwa m'mitima. Chibverano chenechi chalikhiswa pa kufa na pa kulamuka kwa Yezu, na Nzimu wache Wakuchena aphinduzwa mitima. Pa phwando yakumalisa, Yezu ati: Kwatani mbamumwa, ndiko iyi ndi chiropa changa; chiropa cha chibverano chipswa cha kuenda na kuenda. Na matomero a chibverano chipswa cha Mulungu asatipangiza kuti iye asatifuna, pakutichemera na pakutipasa Nzimu wache. Nzimu usatibulusa ntima wathu wa mwala mbutipasa ntima wadidi, unakwanisa kufuna Mulungu na ndzathu. Ntima wakulekera, wakuphembera na wakuphedza.

4. MBATIIYIKHENI MU NSOLO MWATHU MAFALA AWA

Mulungu alonga na mulomo wa mulongeri Ezekyele mbati: "Ndinadzakupasani ntima upswa na kuikha Nzimu wanga upswa nkati mwa imwe".

5. MBATITOWEDZENI MAFALA AWA


Pa maphembero, tisaphemba Nzimu wa Yezu, mbatibvesera pinatipanga iwo pyaufuni wa Mulungu na wa abale.

6. TIPHEMBE

Bwerani Nzimu Wakuchena, bulusa pyakuipa pyanga. Sanduza ntima wanga wakuma ninga mwala, undipase ntima upswa. Ikhani mwa ine Nzimu wako. Amen!

MAKUMBUKIRO A MAPFUNDZISIRO

1. Nee mbumba ya ku nkwiriro nee ya ku nterero idabva pidalonga alongeri. Thangwi ya pyenepi pyachitikirani? **R/ Akulu awo afungirwa, dziko yawo yapisiwa, nzinda wafudziwa.**
2. Pikhakhala iwo kutali na dziko yawo, mwa kutamipswa, Mulungu adwala mbumba yache? **R/ Nkhabe, Mulungu atuma alongeri anango towera kapanga mbumba mu dzina yache.**
3. Mulungu analemba kupi matongero ache? **R/ Mu mitima ya anthu.**
4. Mbani anachita chibverano chipswa? **R/ Ndi Yezu.**
5. Isabvekanji fala ya kuti ntima wa nyama? **R/ Ntima unafuna Mulungu, usaphembera, usalekera, usagawirana.**



NDZAKAZI WA MBUYA

**«Alasiwa thangwi ya madawo athu
akhamenyiwa thangwi ya
pyakuipa pikhachita ife:
tapulumuswa na nyatwa zikhaona iye»**

16. KUDIKHIRA MPULUMUSI: NDZAKAZI WA MBUYA

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALA A MULUNGU

Kufudziwa na kutamipswa kudachita a Israele, mbumba ya Mulungu yathabuswa pikulu pyene. A Israele ku dziko ya kunja (Babilone) akhakhala ninga anthu akufa na akutaika. Ndi thangwi yache mulongeri Yere-mia, Ezekyele na Izaiya ali kulonga kuti Mulungu anafuna kupulumusa anthu adatamiswa: Mulungu anpasa nzimu wache mbatuma mpulumusi n'dzukulu wa Davide.

2. MBATIBVESERENI MAFALA A MULUNGU Isaya 42, 1-4 e 53, 1-4a.6-7.10-12

Mbuya alonga tenepa: "Ali pano ntumiki wanga adawangisa Ine; ndiye adasankhula Ine, mbakoma kuna Ine. Ndandaza na nzimu wanga, towera adzere mbumba zonsene na chirungamo. Hanakhuwa tayu, hanabokhomola tayu, pa nsika hanagaluzi mafala ache tayu. Iye nee hanagwanda ntete wakugongonyeka, nee hanathimisa nyale yakupucira. Anadzera onsene na chirungamo chakukhaliratu. Iye nkhaba kunjuna, nee hanasowa chipapo, mbwenye analikhisa chirungamo pantsi. Anthu alonga tenepa: "Mbani anatawira pinalonga ife chinchino? Mbani akhadziwa kuti: ipi ndi basa ya Mbuya? Mbuya akhafuna kuti: ntumiki uyu akule ninga muti, mbalikha m'mataka akuuma. Iye akhasowa mbiri na ubaliki; nee mbodzi wathu akan'tsalakana. Hakhali na chinthu chibodzi tayu chakukoma kuli ife. Iye tikham'pwaza mbatim'pasa nkholo, mbwenye iye akhabva nyatwa na kupha. nkhaba munthu akhafuna kumuyang'ana, ife tonsene tikhankhonda mbatinchita ninga munthu wapezi. Mbuya alonga tenepa: "Ine ndikhafuna kuti: iye apanwe. Apereka moyo wache, towera akhale ntsembe yakusekesana. Na tenepa anaona adzukulu ache, mbakhala na moyo pyaka pizinji pyene, mbapichitika na iye pikhafuna ine kuti pichitike. Angamala kucere-nga ntsiku zonsene za moyo wache, anatsandzaya pontho, mbadziwa kuti: hadaona nyatwa pa pezi tayu. Ntumiki wanga wakulungama anaonera anthu azinji nyatwa; thangwi ya iye ndinalekera pyakuipa pyawo. Na tenepa ndinam'pasa mbuto ya mbiri, ndinam'pasa mbuto pakati pa akulu na pa anyamphambvu. Thangwi na kufuna kwache apereka moyo wache, mbapapswa tsoka ya anyakuipisa, pikhawkwatira iye anyakudawa azinji pyakuipa pyawo, mbaaphemberera, towera alekerwe". "Mbwenye ndi nyatwa zathu zikhationera iye, ndi kupha kwathu kukhatibvera iye. Iye tikhanyerezeranyereza kuti: nyatwa zache ndi nyatwa zikhamuonesa Mulungu. Iye tonsene tikhali ninga mabira akhadataika, mbaenda ibodzi-ibodzi kwache. Mbwenye Mbuya angwesera nyatwa zikha-

tongwa kubvebswa na ife tonsene. "Iye akhabvuiwa, mbwenye akhachepeseka, mbakhonda fungula mulomo wache. Akhamatama ninga mwanabira anafuna kuphiwa; akhakhonda longa pinthu ninga bira inabvulirwa uweya. Aphatiwa, mbatongwa kufa, mbwenye nee munthu mbodzi akhantsamali Aphiwa thangwi ya madawo a mbumba yathu. Iye tonsene tikhali ninga mabira akhadataika, mbaenda ibodzi-ibodzi kwace. Mbwenye Mbuya angwesera nyatwa zikhathongwa kubvebswa na ife tonsene. "Iye akhabvuiwa, mbwenye akhachepeseka, mbakhonda fungula mulomo wache. Madziko a kutali ali kudikhira 'di mapfundisiro ache".

3. MBATIBVESERENI MAFALA AWA

Asraele akhatawira Mpulumusi wa Mambo ninga Davide. Pa kuthabuka kwawo akhasiya chikhulupiriro na chidikhiri chakukhala na mambo, mbanyereza kuti Mulungu aasiya. Mbwenye Mulungu alonga na mulomo wa nyakupfundza wa mulongeri Izaya pya Mpulumusi – ntumiki wakufuniwa na Mulungu mbathabukira andzache; anadzakhala mambo wakufuna chirungamo mbadzadzesa chirungamo na ntendere. Pyenepyo pisagumanika m'masamba akumalisa a m'bukhu ya Izaya (42- 60) asadziwika ninga "nyimbo ya ntumiki wa Mbuya". Yezu akwata mafala a Ntumiki wa Mbuya towera kuphembera Mulungu pa ndzidzi wakupereka moyo wache towera kupulumusa anthu, Yezu ndi ntumiki wa Mbuya. Ndi mwana wakufunika wa Mulungu adathabuka thangwi ya madawo athu mpaka kutifera pa ntanda, Mulungu nkhadansiya Yezu tayu pa kufa, ampulumusa muli akufa, mbapasa anthu chedza cha chipulumuso cha Mulungu. Pa kulamuka kwace muli akufa apangizambo napyo njira ya chirungamo na ya ntendere.

4. MBATIYIKHENI MU NSOLO MWATHU MAFALA AWA

Mulungu ati: "Alasiwa thangwi ya madawo athu, akhamenyiwa thangwi ya pyakuipa pikhachita ife: tapulumuswa na nyatwa zikhaona iye".

5. MBATITOWEDZENI MAFALA AWA


Pa maphembero athu, tinayang'ana Yezu, ninga Mambo na Mpulumusi wathu. Atikwatira mathabuko athu na madawo. Tinamperekeri takhuta, tilang'anembo mathabuko athu na andzathu. Maseze mathabuko anewa atilemere, tisadziwadi kuti na Yezu tinakwanisa kupirira.

6. TIPHEMBE

Ukumbukire Yezu Kristu, adalamuka mwa anyakufa. Iye ndi chipulumuso chathu, mbiri yathu kwenda na kwenda. Tingathabuka pabodzi na iye, na iye tinadzakhala.

MAKUMBUKIRO A MAPFUNDZISIRO

1. Mbumba ya Mulungu ikhanyereza tani pikhakhala iwo mu dziko yakunja? **R/ Mbumba ikhakhala ninga yafa** mbikhala na kutsukwala maningi.
2. Mulongeri Izaiya apanganji? **R/ Kwebwera kwa mpulumusi.**
3. Mpulumusi unei anakhala tani? **R/ Anakhala ninga n'dzakazi wakuthabuka.**
4. Mbani adalonga Mafala a n'dzakazi wa Mbuya na maphembero. **R/ Yezu, adabwera kudzatipulumusa.**
5. Yezu ali kutipangiza njira ipi? **R/ Njira ya ulinganiri na ya ntendere.**



**«Kulani mbamuinjipa,
dzazani mbamutonga pantsi»**

17. PYAKUCHITWA: MULUNGU APANGIZA KUFUNA

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALA A MULUNGU

Mulungu abulusa mbumba yache mu ubitchu mbamanga nayo chibverano. Mulungu aisasanya na kuikumbidza mbumba yache kuli chibverano chipswa mwa Yezu Kristu na Abram, Mose, Davide. Mulungu aikumbidza mbumba yache towera idziwe kuti Mulungu ndi mbodzi basi wa maso adachita pinthu pyonsene. Na ipi pyonsene pidachita Mulungu a Israele akhala a kudziwa kuti iwo achitwa na Mulungu ninga tenepa: mbani Mulungu? Pinthu pyachitwa tani? Nyatwa yabulukira kupi, kufa na madawo? Mbani munthu? Mu Bukhu yakutoma ya Genesi (ndiko kubveka kutoma), tinagumana kutawira mibvundzo inei yakufunikira. Adalemba Bukhu yakuchena atipanga pya Mulungu, pya anthu, pya madawo... Iwo alemba pire pikhachita na pikhalonga anthu.

2. MBATIBVESERENI MAFALA A MULUNGU Genesi 1,1-31 e 2,1-3

Pakutoma Mulungu acita kudzulu na pantsi. Pantsi pakhali nee chinthu chibodzi tayu. Chidima cikhadagudumira pantsi ponsene, Nzimu wa Mulungu ukhafamba-famba padzulu pa madzi. Mulungu ati: "Mbacioneke cheza". Cheza chaoneka. Mulungu aona kuti cheza chikhali chadidi, na tenepa agawa uku chidima, uku cheza. Mulungu athula masikati cheza, masiku chidima. Tenepa kwapita mawulo na machibese: ndiyo ntsiku yakutoma. Mulungu ati: "Mbacioneke thambo pa nakati-nakati pa madzi, towera awa agawike". Mulungu achita thambo, mbapambula nayo madzi akhali padzulu, na madzi a pantsi pa thambo. Na tenepa pyachitwa. Mulungu aithula 'thambo'. Tenepa kwadoka mbakucha: ndiyo ntsiku yachiwiri. Mulungu ati: "Madzi ali pantsi pa thambo mbaphatane ku khundu ibodzi ene, towera aoneke mataka akuwuma". Na tenepa pyachitwa. Mulungu athula khundu ya kuwuma 'ntunda', khundu idaphatana madzi aithula 'bara'. Mulungu aona kuti ipi mphyadidi. Mulungu ati: "Mataka abale masamba, mawudzu na mbeu; mitimbo ya misapo ibalemba mbeu zawo, za mitundu yakusiyana-siyana, pantsi pano". Na tenepa pyachitika. Mataka abala masamba, mawudzu na mbeu; na miti ya misapo yabalamba mbeu za mitundu yakusiyana-siyana. Mulungu aona kuti ipi mphyadidi. Na tenepa kwadoka mbakucha: ndiyo ntsiku yachitatu. Mulungu ati: "Mbacioneke nyale ku thambo ya kudzulu, towera masikati na masiku asiyane, mbazidzindikirise ntsiku, myezi na pyaka. Izo zinadzakhalamba nyale za ku thambo ya kudzulu, towera zimwinike pantsi". Na tenepa pyachitika. Mulungu achita nyale ziwiri zikulu; ibodzi ikulu towera yonere masikati, inango towera yonere masiku, mbachitambo nyenyezi. Mulungu aziyikha pa thambo ya kudzulu, towera zimwinike pantsi, towera zionere masikati na masiku, towerambo zigawe cheza na chidima. Mulungu aona kuti ipi mphyadidi. Tenepa kwadoka mbakucha: ndiyo ntsiku yachinai. Mulungu ati: "M' madzi mbamukhale pinyama pizinji pya moyo, na ku ntunda mbalame zimburuke pantsi pa thambo ya kudzulu". Mulungu achita pinyama pikulu-pikulu pya m' madzi, pya mitundu yakusiyana-siyana, na pinyama pinango pyonsene pya moyo, pinafamba-famba m' madzi, na mbalame zonsene za mitundu yakusiyana-siyana. Mulungu mbaona kuti ipi mphyadidi. Mulungu apipasa chidzo mbati: "Balanani mbamuinjipa, dzadzani madzi a m' bara, mbalamembo mbazibalembo pantsi". Na tenepa kwadoka mbakucha: ndiyo ntsiku yacixanu. Mulungu ati: "Mataka amerese mbeu za mitundu yonsene, pantsi

mbapaoneke pifuyo na pinyama pyakufamba na pfufu ya mimba, na pikala pya mitundu yakusiyana-siyana". Na tenepa pyachitika. Mulungu achita pikala pya mitundu yakusiyana-siyana, pifuyo pya mitundu yakusiyana-siyana na pinyama pyonsene, pinafamba na pfufu ya mimba pantsi, pya mitundu mitundu. Na tenepa Mulungu aona kuti ipi mphyadidi. Adzamale Mulungu ati: "Mbatichiteni munthu wakulandana ninga ife, wakulandana na ife, towera atonge nyama za m' bara, mbalame za kudzulu, atonge pifuyo na pinyama pyonsene pinafamba na pfufu ya mimba pantsi". Mulungu achita munthu wakulandana na iye, ande, anchita mbalandana na Mulungu; achita mamuna na nkazi. Pa kwaapasa chidzo aapanga: "Balanani mbamuinjipa, dzadzani dziko ya pantsi mbamuitonga. Tongani nyama za m' bara, mbalame za kudzulu na pinyama pyonsene pinafamba-famba pantsi". Mulungu ati: "Ndinakupasanimo tsanga yonsene inagumanika pantsi na mbeu zache, na mitimbo yonsene inabala misapo na mbeu, towera ikhale chakudya chanu. Na kuli pinyama pyonsene pya pantsi, mbalame zonsene za kudzulu, na kuli pyonsene pina moyo, pinagumanika pantsi mbapifamba-famba, ndinaapasambo, ninga chakudya chawo, thongwe yonsene iwisi inamera pa mataka". Na tenepa pyachitika. Mulungu, na kuona pyonsene pidachita iye, apiona kuti mphyadidi maningi. Tenepa kwadoka mbakuca: ndiyo ntsiku yachitanthatu. Tenepa pyamala kuchitwa kudzulu na pantsi na pinthu pyonsene. Mabasa onsene amala pa ntsiku yachitanthatu. Mulungu apuma pa ntsiku yachinomwe, pa kumala mabasa onsene adachita iye. Mbaipasa chidzo ntsiku yachinomwe, mbaichenesa, thangwi yeneyo ndiyo ntsiku idapuma iye Mulungu, pa mabasa onsene adachita iye.

3. MBATIBVESERENI MAFALA AWA

Na pidamala ife kubva, Mulungu asafuna kuti tidziwe ipi: Dziko nja Mulungu. -Dziko yachitirwa anthu. -Mamuna na nkazi achitwa chinthuzithunzi cha Mulungu. -Mamuna na nkazi ndi sawasawa mbakhonda kumwadzana. -Mamuna na nkazi asaphembwa abalane. -Mamuna na nkazi aphate basa ntsiku zithanthatu mbaphindudza dziko. -Mamuna na nkazi apume pa ntsiku yachinomwe, ntsiku ya Mbuya. Pinthu pyonsene pidalembwa padzulu apa mphyadidi. Na mafala a genesi, asatipangiza kuti Mulungu asatifuna mbatichitira pyonsene. Iye achita mamuna na nkazi wa anthu onsene. Na malongerero anango mamuna na nkazi angacita pyadidi asaphata basa na Mulungu towera iende patsogolo basa ya kusasanya pantsi. Asaphatambo pontho na Kristu, mwana mbodzi ekha wa Mulungu adamangira iye mbachita na iye pyonsene ninga mudalanga Paulo pa tsamba yache ya ku kolose 1,15-16.

4. MBATIYIKHENI MU NSOLO MWATHU MAFALA AWA

Mulungu alonga kuli mamuna na nkazi: "Kulani mbamuinjipa, dzazani mbamutonga pantsi"

5. MBATITOWEDZENI MAFALA AWA

-Tipfundze kudzikirira udidi wa Mulungu na pyonsene pidachita iye, mbatinsimbeni. -Tipfundze kulemedza pyonsene pidachita Mulungu. -Mbatiphateni basa tikhale na makhaliro adidi pa dziko kuli udidi wa onsene.

6. TIPHEMBE

Ticheule Tonsene pabodzi Salmo ya 8, inalonga pya umambo wa Mulungu na pya udidi wa munthu. (Cfr. Pág. 43).

MAKUMBUKIRO A MAPFUNDZISIRO

1. Bukhu yakutoma ya Biblya isachemerwa tani? **R/ Genesi.**
2. Pisatipfundzisanji ipi pya kuchita kwa pantsi? **R/ Kufuna kwache Mulungu anthu?**
3. Mbani achitwa wakulandana ninga Mulungu? **R/ Mamuna na nkazi.**
4. Ndi thangwi yanji nkhaba kuphata basa ntsiku ya Dimingu ya Dimingu isatikumbusa ntsiku yachinomwe, ntsiku yakupuma Mbuya na ya kulamuka kwa Yezu.
5. Tirikuona tani basa yakuchitwa kwa pantsi na Mulungu? **R/ Pyonsene pikhali pyadidi.**

EVA, NKAZI WAKUTOMA NA NYOKA



«Thangwi yanji wapichita ipi?»

18. MUNTHU ASALONGA CHINTHU, ANGAMALA ASACHINJA PONTHO

Makumbukiro a mapfundziro a nduli

1. MBATISASANYIKENI TOWERAKUTAMBI- RA MAFALA AMULUNGU

Bukhu ya Genesi isatipangisa kuti asapibvesa tani pya wipi, pya nyatwa na pya kufa. Na thangwi ya pikhafotokoza munthu nyakulemba Bukhu yakuchena alonga tenepa "Mulungu aikha Adamu na Eva m'munda wa Edeni mwenemo mukhali na miti mizinji ya misaphu na pinyama pidachita iye Mulungu. Pa pinyama pyenepi nyoka ndiyo yakuchenjera maningi".

2. MBATIBVESERENI MAFALA A MULUNGU Genesi 3, 1-13.16.19

Nyoka, yakwipa na yakuchenjera kupita pinyama pyonsene pya n' tsanga pidachita Mulungu, abvundza nkazi: "Ndimu mwene kuti Mulungu akukhondesani kudya nsapo wa muti ubodzi pa tapada"? Nkazi atawira: "Tinadya misapo ya miti yonsene ya tapada. Mbwenye nsapo wa muti uli pakati pa tapada, Mulungu alonga: "Chipa na lini munadzadya nsapo wa muti uyu, nee kuukhuya, na tenepa mungadzachita, munadzafa". Nyoka yatawira nkazi: "Nkhabe, nee hamunadzafa tayu. Mbwenye, Mulungu asadziwa kuti, ntsiku inadzadya imwe, maso anu anadzafunguka, imwe munadzakhala sawa-sawa na Mulungu, muna-dzadziwa pya udidi na pyakwipa". Nkazi aona kuti nsapo wa muti ukhali pyadidi kuudya, thangwi ukhakomadi, na kuti wenewo ukhakwanisa kuapasa nzeru, tenepa akwata nsapo mbadya, mbapasambo mamunache, akhali pabodzi na iye, iyembo adyambo. Na kabodzi kene afunguka maso a awiri awo, mbadzindikira kuti akhali chipenzi-pezi, mbaphataniza masamba a nsambvu, ibodzi na ibodzi, mbabvala n' chuno mwawo. Mphapo, na mawulo, pa ndzidzi wakutoma, pidabva iwo kuti Mulungu akhafamba n' tapada, mamuna na nkazi abisalira Mulungu, pakati pa miti ya n' tapada. Mbwenye, Mulungu achemera mamuna mbambvundza: "Uli kupi?" Iye atawira: "Ndabva mititi ya mafambiro anu n' tapada, mbandibisala na kugopa pikulu, thangwi ndiri chipenzi-pezi". Mulungu ambvundza: "Mbani adakupanga kuti uli chipenzipezi? Wadya mphapo

nsapo wa muti ule udakukhondesa ine kudya?" Mamuna atawira: "Nkazi adandibweresera imwe, andipasa nsapo, ine mbandidya". Mbuya Mulungu abvundza nkazi: "Thangwi yanji wapichita ipi?" Nkazi atawira: "Nyoka yandinyengerera, ine ndadya". Pakumala apangambo nkazi: "Ndinadzakuthimizira nyatwa pa manungo pako, mbubva kupha pa kubala anako. Unadzasaka na uthabuki mbani anadzakhala mamuna wako". Unadzadya phoso yako, mbwenye na kudjodja kaluma pa nkhope pako, mpaka kubwerera pontho ku matata kudabuluka iwe, thangwi iwe ndiwe pfumbi, mbudzabwerera pontho ku pfumbi".

3. MBATIBVESERENI MAFALA AWA

Adamu na Eva hadabvera Mulungu tayu mbafuna kukhala sawasawa na iye. Na tenepo asiya kubvera Mbuya mbadawa. Kudawa kwawo kwaaonesanya nyatwa mbafa. Na chithankano chenechi chatipfundisa kuti munthu pakutoma agumana pyakui-pa, kuthabuka na kufa muli iyenene na n' khundu mwache. Thangwi ya penepyo Mulungu atu ma mwanace Yezu Kristu adadzaphinduza anthu towera akhale ninga ana a Mulungu thangwi ya mafala ache. Na Yezu, anthu anakwanisa kuombokwa m' madawo mbakhala anthu a chipapo, pa kuthabuka na pa kufa mbakhulupira.

4. MBATIYIKHENI MU NSOLO MWATHU MAFALA AWA

Mulungu ati: "Thangwi yanji wapichita ipi?"

5. MBATITOWEDZENI MAFALA AWA

Pa makhaliro athu ndi ninji pinatiendeswa mwa pyakuipa?


Longani pinanyerezera imwe. Tinapikunda tani pyenepi?

6. TIPHEMBE

Salmo 51,1: "Ndimwe wa ntsisi, Mulungu, ndibvereni ntsisi! Fudzani madawo anga thangwi ya udidi wanu! Nditsukeni ine wamumphu m' manya anga, mbamumdichenesa m' machimo anga on-sene. (Tilongue tonsene): Khalani na ntsisi na ine, hó Mbuya Mulungu, na umboni wanu.

MAKUMBUKIRO A MAPFUNDZISIRO

1. Mulungu pa kumala kuchita Adamu na Eva aikha kupi? **R/ Mu munda wa Edeni.**
2. Biblya isatipanga kuti nyoka ndiyo idanyengerera Adamu na Eva kuti adawe. Mphapo iwo akhafunanji? **R/ Akhale ninga Mulungu.**
3. Mafotokezero a Genesi asatipfundaisanji? **R/ Kuti pakutoma, pakhali nyatwa, utenda na kufa.**
4. Mbani anakwanisa kutipulumusa m' madawo? **R/ Yezu Kristu, Mwana wa Mulungu.**
5. Fokotoza na mafala ako ninga pinalonga Biblya pyakutoma kwa madawo pa dziko ya pantsi...



MBATIMWADIYA UKULU WA NOA

**«Chipo munthu peno chinyama,
anadzalowa m'madzi a ndzalo»**

19. MULUNGU ALI NA FALA IBODZI

Makumbukiro a mapfundziro a nduli

1. MBATISASANYIKENI TOWERAKUTAMBIRA MAFALA A MULUNGU

Mafala onsene a Bukhu yakuchena asachita umboni wa kuti Mulungu ndi wadidi iye asafuna anthu mbadwala madawo awo. Ninga tenepa, Mulungu adwala madawo a Yakobe, a Mose, a Davide, na anango. Mu Bukhu ya Genesi, tisawerenga pidachirwa Noa ipi pisatiphedza kupibvesa kuti Mulungu ngwadidi. Ndi penepi pisatipangiza kuti Mulungu nkhaba kuchinja fala inalonga iye, iye Mulungu ali na fala ibodzi basi, asafuna anthu mbadwala pyakuipa pyawo.

2. MBATIBVESERENI MAFALA A MULUNGU Genesi 6 mpaka 8

Ipi ndi pidatambwa na ndzindza ya Nowa: Nowa akhali munthu wadidi na wakulungama pakati pa anthu a ndzidzi wache, mbatawira Mulungu. Noa abala ana atatu: Semu, Kamu na Yafeti. Pantsi pakhadabwenjika pa maso pa Mulungu, mbapadzala na madawo. Mulungu alang'ana pantsi mbaona kuti paipa, thangwi anthu onsene akhadamala kubvunda na makhaliro awo akwipa. Na ipyo, Mulungu alonga kuli Nowa: "Ndzidzi wakumala kwa anthu onsene wakwana pa maso pa ine. Pantsi pano padzala na chiropa, thangwi ya iwo. Ndinadzaamalisa, na pantsi pano pabodzi. Sasanya mwadiya ukulu wa mapulango akuberuka, unadzaugawa mbuto mbuto, mbudzaukwadza na sakatraya kunja na m'bwalo. Unadzaucita tenepa: ugugumi wa makhono madzana matatu, ugwangwanyo wa makhono makumaxanu na ulaphi wa makhono makumatatu. Kudzulu unadzacita mphengo, ya khono ibodzi nsika wache. Unadzayikha nsuwo wa mwadiya pa khundu, unadzamanga mwadiya na nyumba yache ya ndzulu, na indzachembo padzulu pache. Thangwi ndinadzatumana ndzalu pantsi pano, towera ndidzamalise dziko ya pantsi pyonsene pina muya wa moyo pantsi pa thambo. Pyonsene piri pantsi pano pinadzamala. Mbwenye na iwe ndinadzamanga chibverano changa: unadzapita m'mwadiya na anako na nkazako na akazi a anako, akwenyako. Pa pyonsene pina moyo, na mwa pinyama pyonsene, unadzayikha m'mwadiya piwiri piwiri, pya

ntundu ntundu, pya m' maso, towera pipulumuke pabodzi na iwe: chibodzi chimuna na chibodzi chikazi. Pa ntundu wa mbalame, pa ntundu wa pinyama pya myendo minai, na pa ntundu wa pinyama pyakupswenda pantsi, upambule piwiri, chimuna na chikazi, towera upikoye na iwe, mbapikhala na moyo. Gumanyambo pizinji pyakudya mbupikoya, towera pikhale phoso yako na ya pinyama pabodzi". Nowa atoma kuphata basa, mbacita pyonsene ninga mudapangirwa iye na Mulungu.

3. MBATIBVESERENI MAFALA AWA

Mulungu si nyamalwa wa anthu tayu, mbwenye ndi xamwali wa anthu adidi na akuipa. Kufuna kwa Mulungu ndiko kubveka kuti Mulungu hasafuna tayu kuti anthu afe, mbwenye asafuna anthu mpaka pakumalisa. Maseze mama munthu adwale mwanache, mbwenye Mulungu hanadwala anace tayu, alonga mulongereri Izaya. Kufuna kweneko kwakukhonda mala kwa Mulungu kwaoneka mwa Yezu.

4. MBATIYIKHENI MU NSOLO MWATHU MAFALA AWA

Mulungu ati: " Chipso munthu peno chinyama, anadzalowa m'madzi a ndzalo". Genesi 9, 11.

5. MBATITOWEDZENI MAFALA AWA

Ndi ninji pinapangiza kuti Mulungu ali na ife kuenenda na kuenda?

Ndi ninji pinapangiza kuti Mulungu asatiphedza mbatipasa mphambvu?

6. THIPHEMBE

Mbuya ndi mpulumusi wanga, mbani anagopa ine? **Refrão:** Mbuya ndi mpulumusi wanga. Ine nkhaba kugopa n'dani wanga angabwera kudzamenyana na ine.

Refrão: Mbuya ndi mpulumusi wanga. Mbuya mundikoye. Lekani kundileka, lekani kundisiya. Mulungu mpulumusi wanga! Angakhati anyakubala anga andisiya, imwe Mbuya, Ndimwe munakhalala na ine kwenda na kwenda.

Refrão: Mbuya ndi mpulumusi wanga.

MAKUMBUKIRO A MAPFUNDZISIRO

1. Dzina yache mbani adamanga modiya ukulu maningi mbamupita pinyama nkati? **R/ Noa.**
2. Ndimu mwenedi kuti Noa akwanisa kuikhamo modiya pinyama pyonsene? Thangwi yanji? **R/ Nkhaba, thangwi pidachitika kuli Noa nkhutipanga kuti Mulungu nkhaba kufuna kupha pidachita iye.**
3. Fokotoza pya Noa!
4. Ndimu mwenedi kuti Mulungu asankhonda nyakudawa? **R/ Nkhaba, Mulungu asatifuna kwenda na kwenda.**
5. Mbani anadwala Mwana wache? **R/ Mai anadwala Mwanace mbwenye Mulungu nkhaba née kabodzi kudwala ana ache.**

KUTHIMIZA: MASALMO

Salmo 145(144)

*Mulungu asatongwa kusimbwa Kusimba kwa Davide
Nyimbo ya kusimba Mulungu*

- ¹ Ndinakukuzani Imwe, Mambo, Mulungu wanga; dzina yanu ndinaisimba kuenda na kuenda.
- ² Ndinakuchitani takhuta ntsiku na ntsiku, mbandi-simba dzina yanu kuenda na kuenda.
- ³ Mbuya ngwankulu na wakusimbika maka, ukulum-bo wache ngwakukhonda bveseka.
- ⁴ Ubalwi na ubalwi unasimba machitiro anu, mbudziwisa mabasa anu a mphambvu.
- ⁵ Anthu analonga pya ukulu wanu wa mbiri, na pya pirengo pyanu pyakudzumisa.
- ⁶ Anafokotoza mphambvu zanu zakugopswa, mbabvekesa pya mabasa anu makulu.
- ⁷ Anariyisa uddi wanu wakukoma, mbachita dondowe chilungamo chanu.
- ⁸ Mbuya ngwakufunika na wa ntsisi kakamwe, anadembuka kusiribzwa mbadzala na kufuna.
- ⁹ Mbuya ngwadidi kuli anthu onsene, ntsisi zache ntsa pyonsene pidachita Iye.
- ¹⁰ Mbuya, pinthu pyonsene pinakusimbani, mbakuchitani takhuta axamwali anu.
- ¹¹ Anafokotoza umambo wanu wa mbiri, mbalongesa pya mphambvu zanu,
- ¹² towera onsene adziwe mphambvu zanu, na mbiri ikulu ya umambo wanu.
- ¹³ Utongi wanu ngwa ntsiku zonsene, umambo wanu ngwa ubalwi na ubalwi. Mbuya ngwakukhulupirika m'pyonsene pinalonga Iye; pyonsenembo pinachita Iye mphyadidi kakamwe.
- ¹⁴ Mbuya anatsidzikira ale anafuna kugwa, mbalamusa pontho ale anakhurubzwa.
- ¹⁵ Amoyo onsene anatondora pyakudya pyawo, mbapipabswa mbodzi mbodzi pa ndzidzi wache.
- ¹⁶ Munafungula dzanja yanu mbamupikhutisa mu utende mwanu pyonsene pina moyo.
- ¹⁷ Mbuya ngwakulungama m'mabasa ace onsene, pyonsenembo pinacita Iye mphyadidi kakamwe.
- ¹⁸ Mbuya ali duzi na onsene anancemera, mbaphemba uphedzi wace na ntima wa maso.
- ¹⁹ Ale anangopa anaapasa pinafuna iwo; anaabvera mikhuwo yawo mbaapulumus.
- ²⁰ Mbuya anakoya onsene ananfuna, mbwenye anyakuipa onsene anaafudza.
- ²¹ Mulomo wanga unabvekesa mbiri ya Mbuya; a moyo onsene asimbe dzina yache kuenda na kuenda.

Salmo 8

Ukulu wa Mulungu na mbiri ya munthu

- ¹ Dzina yanu, Mbuya Mulungu wathu, nja mphambvu pantsi pano ponsene! Ukulu wanu unapiringana kudzulu, mbusimbwa na ana ang'ono na a pa bere.
- ² Mwapangiza adani anu mphambvu zanu, mbamumatamisa onsene anakupokanyani.
- ³ Ndingayang'ana kudzulu, basa ya manja anu, mbandiona mwezi na nyenyezi idaikhapo imwe,
- ⁴ ndinati: "Munthu ninji towera munkumbukire, ife pano ninji, towera mutitsalakane?"
- ⁵ Mbwenye mwacepesa munthu kupita imwe basi, mwambvalisa nthimba ya ukomi na ya mbiri,
- ⁶ mwankhalisa mbuya wa basa ya manja anu, mbamumpasa mphambvu za kutonga pyonsene:
- ⁷ Pifuyo pyonsene pikulu na ping'ono, pikalambo pyonsene pya n'tsanga,

- ⁸ mbalame za kudzulu na nyama za m'madzi, na pyonsene pinapakasa m'bara.
- ⁹ Dzina yanu, Mbuya Mulungu wathu, ina mphambvu pantsi pano ponsene Nyimbo ya Mulungu muomboli

Eksodo 15

- ¹ Penepo Mose na aisraele aimbira Mbuya nyimbo iyi, mbati: "Ndinaimbira Mbuya, adakunda na mbiri, na kuponya m'bara mahaji na anyamahaji ene.
- ² Mbuya ndi mphambvu zanga zikulu, ndiye ekha basi adandipulumusa. Ndiye Mulungu wanga anasimba ine, Mulungu wa babanga, anapasa ine mbiri.
- ³ Mbuya ndi nyankhondo; Mbuya, ndiyo dzina yache.
- ⁴ Aponya m'bara ngolo za Farao na anyankhondo ache; anthu ache akusankhulwa alowa m'bara yakufwira.
- ⁵ Mabimbi aagudumira, iwo abira pa kuzika ninga mwala.
- ⁶ Manja anu a mphambvu, Mbuya, manja anu afudza anyamalwa.
- ⁷ Na ukulu wanu wakudzumisa mwagwisa adani anu pantsi, na motombo wa ukali wanu mwaapisa ntinga udzu.
- ⁸ Na mphambvu za muya wanu madzi apakika, awuma, mbaimira ninga nkhomole, pakati pa bara yakufwira.
- ⁹ Anyamalwa ati: "Tiathamangire, mbatiaphata! Tigawane chuma chawo, mbatikhutibswa naco! Tisolole talasada, mbatiafudza onsene!"
- ¹⁰ Mbwenye imwe mwapupusa muya wanu, barambo yaagwera, mbiagudumira. Ninga ntobvu abira m'madzi makulu.
- ¹¹ Mbuya, mbani pakati pa alungu ninga imwe? Mbani wakuchena na wankulu ninga imwe? Mbani wakugopswa pa kuchita pirengo na mabasa akudzumisa ninga imwe?
- ¹² Pidathukula imwe nkono wanu wa madyo, pantsi pafunguka, mbapameza adani athu.
- ¹³ Mwapulumusa mbumba yanu, mwaitsogolera na uddi wanu, mbamuifikisa ku nyumba yanu yakuchena.
- ¹⁴ Na kubva ipi mbumba zatetemera, afilisiti aphantwa na mantha,
- ¹⁵ amambo aedomi adzudzumika, anyamphambvu amoabu atutumuka, akanani onsene ataya ntima.
- ¹⁶ Agwerwa na mantha akugopswa. Na kuona mphambvu za nkono wanu, awuma ninga mwala; pikhapita mbumba yanu, mbumba yanu, Mbuya, idagula imwe.
- ¹⁷ Chinchino munaifikisa ku phiri yanu, mbamuitcheke ku mbuto kunakhala imwe, duzi na nyumba idamanga manja anu.
- ¹⁸ Mbuya, ndiye mambo kuenda na kuenda". Nyimbo ya Mariya
- ¹⁹ Pidapita mahaji a Farao m'bara pabodzi na ngolo na anyakutekenya awo, Mbuya agumaniza madzi, mbaabiza m'bara. Mbwenye aisraele afamba m'bara pa kuwuma.
- ²⁰ Apo Mariya, mulonger, mwanankazi wa Aaroni, akwata chimbendenga chache, akazimbo onsene, na kuliza chimbendenga, antowera mbabvina-bvina.
- ²¹ Mariya akhaimba nyimbo, iwombo atawira, mbati: "Imbirani Mbuya, thangwi aonesa ukulu wache. Aponya m'bara mahaji na anyamahaji ene!"

MAPHEMBERO A NTSIKU ZONSENE

NA DZINA YA BABA...

Na Dzina ya Baba, na ya Mwana, na ya Nzimu Wakucena. Amen.

BABA WATHU

Baba wathu muli kudzulu, dzina yanu ikhale na mbiri. Dziko yanu mbidze kuna ife. Kufuna kwanu kuchitike pantsi pano ninga kudzulu. Tipaseni lero kudya kwathu kwa ntsiku zonsene. Tilekereni madawo athu ninga ifembo tinalekera andzathu madawo awo. Lekani kutileka mbatitaika; tipulumuseni m'pyakuipa. Amen.

MWENYI MARIYA

Mwenyi Mariya, wakudzala na nkhombo, Mulungu Mbuya ali na imwe, Wakusimbwa ndimwe pakati pa akazi, Wakusimbwambo ndi mwana wa m'mimba mwanu, Yezu. Mariya wakuchena, mama wa Mulungu, Phemberani ife anyakwipa, chinchino na ntsiku ya kufa kwathu. Amen.

MBIRI KULI BABA

Mbiri kuli Baba, na kuli Mwana, na kuli Nzimu Wakuchena, ninga pakutoma, mbikhale chinchino, na ntsiku zonsene zakukhaliratu. Amen.

NDINATAWIRA MULUNGU BABA

Ndinatawira Mulungu mbodzi ene. Baba wakukwanisa pyonsene, adachita pya kudzulu na pya pantsi, pyonsene pyakuoneka na pyakukhonda kuoneka. Ndinatawira Mbuya mbodzi basi, Yezu Kristu, Mwana mbodzi ekha wa Mulungu, adabalwa na Baba kalene, pyonsene mbapidzati. Mulungu wa Mulungu, cheza cha cheza. Mulungu wa maso wa Mulungu wa maso, adabalwa nee kuchitwa, sawasawa kakamwe na Baba. Ndiye adachita pinthu pyonsene. Abuluka kudzulu thangwi ya ife anthu, towera kudzatipulumusa. Na mphambvu za Nzimu Wakuchena akwata manungo m'mimba mwa Mwali Mariya mbakhala munthu. Akhomerwa pa ntanda, thangwi ya ife, Ponsyo Pilato mbantonga, aona nyatwa mbaikhwa. N'kucha mwache alamuka muli akufa, ninga mudalembwa m'mabukhu a Mulungu. Akwira kudzulu kunakhala Iye pa nkononkono wa Mulungu Babache. Kweneko anadzabwera pontho wakudzala na mbiri, towera kudzatonga ali maso na akufa, na kutonga kwache chipo kunadzamala. Ndinatawira Nzimu Wakuchena, Mbuya mwanachiro moyo, anabuluka kuna Baba na kuna Mwana, mbalambirwa sawasawa ninga iwo, mbakhala na mbiri ibodzibodzi. Ndiye adalongera alongeri. Ndinatawira Igreja ibodzi ene, yakuchena, ikatoliko na ya apostulu. Ndinadziwa batismu ibodzi basi inafudza madawo. Ndinadikhira kulamuka muli akufa na ntendere unafuna kuona ife mu dziko yakukhonda mala. Amen.

MOYONI NYANYI (RAYINYA)

Moyoni Nyanyi Mama wa Ntsisi, moyo, waku-dzipirwa kudikhira kwathu, moyoni, kuli imwe tinakuwa, anyakusuwa ife, ana a Eva. Tinakumerani mbatibuulira mbaatirira pantsi pano pa misozi, Imwembo, mbvunuliri wathu mutiyang'ane na maso anu awa a ntsisi. Zingamala nyatwa zathu pantsi pano tipangiseni Yezu, mwana wakusimbwa wa m'mimba mwanu. Ndimwe wakufewa, ndimwe nyantsisi, ndimwe wakukhulupirwa, mwali Mariya. Phemberani ife mama Wakuchena wa Mulungu. Towera tikwanise kutambira pidatipanga Kristu. Amen.

BWERANI NDZIMU WAKUCHENA

Bwerani, Nzimu Wakuchena. Dzadzani mitima mwa anyakutawira anu na moto wa achifunano. Tumani, Mbuya, Nzimu wanu, pyonsene pinadza-chitika. Munadzaphindudza pantsi pano. Tiphembe: Mbuya, mudapfundisa mitima ya anyakutawira anu na chedza cha Nzimu wakuchena, chitani kuti tifune mwadidi mwene pinthu pyonsene ninga munapifunira nzimu wenewu towera tibalanga-bzwe nawo kuenda na kuenda. Na Yezu Kristu Mbuyathu. Amen.

MACINYUKIRO


Mulungu Wanga, thangwi yakukomeratu kwanu, ndisakufunani na ntima wanga wonsene, ndachinyuka pyakuipa pyanga pyonsene pidachita ine. Na kupicita ndapwaza imwe, Baba na Mbuyanga wakufunika kakamwe. Ndacinyuka Mbuya, ndiphedzeni na nkhombo zanu ndirekeretu kuchita pyakuipa pyonsene. Ndisaphemba mbandikhira kulekerwa kwa madawo anga na ntsisi zanu za kuenda na kuenda. Amen.

MACHINYUKIRO (NCHIGWAGWA)

Mulungu wanga, thangwi ndimwe wadidi kakamwe, ndachinyuka pyakuipa pidakuchitirani ine, ndiphedzeni ndikhonde kudawabve. Amen.

MAPHEMBERO A KATEKEZI MBIDZATI KUTOMA

Ife tinakusimbani Mbuya Yezu Kristu, thangwi mwatchemera mbamutigumanyiza pano, towera tikule mbatiwanga muchitawiro, ife tinakuperekerani takhuta thangwi ya katekista wathu anakuphatirani basa na kutipasa nzeru za njira ya kuenda kagumanikana na Mulungu. Ife tisakuphembani kuti mutifungule mitima yathu, nzeru zathu, maso athu na makutu athu towera tikwanise kuchita chifunano chamaso na cha udidi wa Mulungu Babathu. Towera pakumala katekeze tibwerere ku nyumba na chikhulupiriro cha kutowera njira yanu ninga mudachitira apostolo, mbatisaka kukhala amboni a Mphangwa Zadidi, na anyakumwaza a mphangwa zanu. Amen.



THANYO YA KUTOMA YA UKATEKUMENO

Arkidiocese ya Beira

Malemba awa ndi macinciro a bhuku ya katekezi «Israel People Choisi por nos donner le Libertateur», ya diocese ya Maroua-Mokolo (ndzinda wa kunkhomu na kumakwiriro kwa Camarões).

© Arquidiocese da Beira